

東
林
列
傳
大

東林列傳

東林列傳卷二十二



江陰陳鼎定九輯門人

沈霽載陽

全校

蔡世英偉人

明

丁元薦傳

丁元薦字長孺號慎所浙江長興人萬曆丙戌進士質剛骨勁見大識超歷挫抑甘厄窮百折而東不餒

其浩然之氣。初官中翰。矢口而陳當世之弊。時以爲賈誼之疏。與世遂不相臭味。一斤而歸。沉寂田間者數年。再起儀部。復矢口而陳當世之弊。時以爲汲黯之戇。與世益枘鑿而不相投。於是鍛其翅。絕其轡。至欲割以大盜之刃。一決目中之刺。竟中他事。削籍歸。甲子元晨。賢令被弒。一邑震慄。若將隕墜。元薦奮不自計。流言矢集。屹無所避。擒盜寧民。一邑得安。平時究心理學。其加功也淡。其用心也密。凡東林諸君子無不就正。而於顧憲成則師事之。憲成嘗答書曰。承

示新功甚善。周子揭主靜是得手事。程子見人靜坐便歎其善學。是入手事。李延平教人靜坐。看喜怒哀樂未發時氣象。又就中點出一活機。此大儒留下海上單方也。他日又云。得手書不勝欣慰。足下用心如此。何患不日進也。寡欲二字極妙。周元公首闡聖學。亦只此二字。是一了百了功夫。更不須此疑。願與足下共勉之。亦只密切做去。不須悔前慮後。反成懂懂。令心體上多一事也。嘗過無錫。赴東林會講。他日憲成致書曰。東林之會。風色蒸蒸。座上發貧賤富貴一

則尤令聽者竦起足下之功於是乎大矣年七十卒
天啟中以其爲憲成門人也禁錮之崇禎朝乃復
外史氏曰當明末時習俗化儻苟有良心者卒不能
合况先生乎故一出再出而終見惡於時流此其入
山惟恐不淡而甘老於田間也

汪康謠傳

汪康謠字淡衷號鶴嶼休寧人精研理學以紫陽朱
子爲宗弱冠舉於鄉萬曆癸丑成進士授諸暨令摘
奸翦暴不避權貴擢戶部司庾臨清以練兵備白蓮
賊有功陞郎中出守漳州蒞任日瞿然起曰是紫陽
舊治也吾產於其鄉仕同其地豈別問治譜哉一考
故憲申之爲自約者八約屬者三又有八禁五不擬
著爲令皆以實心行實政州大治尋舉卓異第一推
漳南叅藩適魏崔肆烝崔爲同門友嘗授意招致乃

峻詞拒絕守漳三載迄不通一字崔啣之巡撫周起元坐贓數萬下漳州籍沒士民洶洶泣訴康謠亦泣曰吾不惜此一官以護孤忠寢其事不累漳一人益忤崔意推陞疏上逆璫矯旨削奪去後漳民思其德奉祀朱文公右額曰新安兩夫子祠崇禎改元起福寧兵憲時紅彝不靖賊氛羣起乃廣什伍集亭障嚴接濟嘗以元旦馳師寇不及備斬馘無算寇平以疾告歸日講學於天泉還古書院精治尙書體朱子大意爲之註有尙書刪補一編行於世學者稱鶴嶼先生

外史氏曰先生守漳及備兵福寧政事功績歷歷在人耳目惜乎終於泉石而不復再出噫先生亦知時事之不可爲矣

林宰傳

林宰字德衡福建漳浦人萬曆辛丑進士授無錫縣令蒞任後適東林方興講學遂捐復講堂其後重建道南祠成又爲之記其略曰宰維吳地自讓王篳路而來季子歌風言游禮樂斌斌號文學之國矣中更六朝五季剝蝕於談塵榛蕪於戎馬非先生正學南來五百年墜緒何以昭茲來許顧或謂南宋道學空談無用宰按先生策燕雲之師則云宜退守汴京不
可虛內示外金人內寇則云宜堅壁清野潛遣援兵

追襲至於三鎮不可棄和議不可從責金人敗盟問
肅王使必復而後已種種石畫皆熟諳情形事變淡
於兵家者之言此真有用道學豈與爭機鋒而渺功
實者埒也或又以其辟應蔡京爲疑不知先生鴻才
鉅識行權濟時正善學二程而融之使其志得行於
靖康建炎間則女直可無南窺二帝可無北狩一祖
六宗之業可無偏安江左奈之何阨於權奸不究其
用以殉此諸君子所謂扼腕太息而欲宰之論其世
也歟自東林復振後每月主會遇當道憲長四方賢

哲一軌於禮其有心衛道如此至先後試士拔馬世
奇華允誠爲第一人稱冰鑑云其加意人文又如此
凡民間有事剖斷如流按律得情吏胥不得上下手
去任後民思之曰安所得林青天哉其得人心又如
此官歷部曹至南京兵部侍郎卒學者稱平華先生
後逆璫毀書院見宰碑記遂入東林榜中削奪崇禎
改元乃復

外史氏曰先生作令梁溪政治和平青天之謠婦人
女子至今猶能道之其所取士皆一時節義文章之

流嗟乎今安得所謂林青天者出而爲宰一振東林耶

賀時泰傳

賀時泰字叔交湖廣江夏人平時寡交遊惟與同里郭文毅大冶尹蕭槐胡對薇砥礪文行旣諸公次第貴顯時泰淹蹇貧益甚諸公或相向爲慰藉時泰夸然嘗遇歲除不能具一杯羹以一母雞荳二升易米七升五合支度歲三日糧賦詩自勵曰清苦丈夫志風霜善自持陽和菲不愛義命貴安之是時長子逢聖尙幼風度端凝屹如莊士時泰目顧而心許之自是益樂饑課子迄逢聖貴卽大書於堂云當年雞荳

未忘念。此日見孫勿妄思。以故逢聖自釋褐金華。歎歷揆府及於受命成仁三十餘年。如一日。壹惟奉其家。教鄉黨比於郭有道。邵安樂。一日見高攀龍。依庸堂扁榭。取道不遠人之義。乃作人模樣一書。自人之大體小體。以及同體異體約數十條。允堪做法。又著思聰錄一卷。其人模樣書云。士人所守若未能定。先從鄉黨中尋一個真節婦人做樣子。便不難了。嘗與山右河汾人辛全字復元者為學問友。手書商學交最善。別著三世事小錄及女箴二十四則。皆有裨名。

教有關世道之言。學者稱陽亨先生。又稱人模樣先生云。

外史氏曰。先生一雞一荳。猶顏子之一簞一瓢也。樂饑課子。不以貧累及子。貴而志不少易。非得道之淡者。烏能至此哉。

史孟麟傳

史孟麟字際明宜興人九歲能屬文長益砥志於理學萬曆癸未成進士由庶常授工科給事知無不言丙戌皇三子生有詔封母鄭皇貴妃草疏論其不可草具偶示同鄉姜士昌乃袖而歸署其名以上一時羣臣連起諍之章凡數十上俱被譴謫而鄭亦止稱貴妃論者稱士昌翼儲首功而不知疏實出孟麟也癸巳有旨三王並封內閣王錫爵擬諭以進乃同水部郎岳元聲率省部諸僚大聲疾呼沸於邸沸於朝

疏既數十上孟麟更綜集羣篇彙括體要爲條議答問奏之。大指謂中宮無待嫡之條元子無封王之例。又曰有嫡立嫡不聞無嫡而待嫡無嫡立長不聞有長而虛長其詞委折詳覈俾難者無復置辯由是並封議寢震位旋定而錫爵啣之會孟麟有疏劾中貴遂擬旨予杖孟麟乃易囚服趨朝待命上知其忠有密諭閣臣終不譴言官以快近習旨竟留中既而疏救選郎趙南星與朝議忤遂相繼稱疾歸時孟麟與南星尙未識面後並出山始交善尋掌吏垣並佐察

典所排擊多強貴南星因奉旨褫削孟麟復疏救亦免歸外艱闋晉太常少卿再丁內艱服闋不補久之特起太常少卿提督四譯館初御史劉光復嘗指斥東林又抨所交淮撫李三才及戊午挺擊變作光復廷諍下獄上怒叵測孟麟方奉差在途見邸報奮然抗疏請立皇太孫赦光復疏入被旨切責謫降運判光復得減死惟伸公是不計昔嫌人尤以爲難前後林居三十年偕同志研求濂雒宗旨既捐其世業就邑中創明道書院復游錫山師事顧憲成友事高攀

龍質疑問難要諸至當爲學本不雜禪至篝燈丙夜
危坐澄懷人有疑爲禪者尤喜獎誘後進出其門者
多爲聞人病中矻矻著書聞國是紛紜淡切牛李朔
蜀之憂後竟如其言天啟初補大理丞晉太僕卿未
赴卒贈禮部右侍郎賜祭葬後以東林追尊崇禎立
乃復學者稱玉池先生著有明道附言亦爲堂集併
奏疏行於世

外史氏曰予讀先生文慨然想見其爲人及考其懿
行乃知爲一代賢者不徒文字而已也先生歿後姦
黨喬應甲誣爲東林護法而削其籍應甲攻東林疏
凡三十上極言諸賢之惡以是清流盡削奪然千百
世下是非昭然究何益哉

葉茂才傳

葉茂才字參之無錫人性至孝痛母先逝事父逾謹
萬曆己丑成進士授刑部主事三月旋告改南迎養
遂得南工部權稅蕪關念商重困以寬恤為主去關
五十里有雙港往譏防漏稅風濤不測易爲商厲立
命弛其禁差竣改吏部郎中請告歸起禮部郎中歷
遷太僕少卿時御史唐世濟疏斥諸建言者爲邪黨
乃上疏爭之略曰當日發奸摘伏論列沈一貫湯賓
尹諸人者謂之邪黨則曲庇私人壞祖宗二百餘年

東林及傳 卷三十一 三
詐典明通關節壞二百年大典者反爲正人君子乎
變亂是非將貽國家無窮之禍不報諸黨世濟者羣
起攻之又嘗激於年例考選不公上書鄭太宰云年
例兩衙門之劣處也考選尤言路一大關鍵也去取
間風聲所係命處一真品則真者畢懼選一偽品則
偽者畢進尙何以年例考選爲又嘗致書高攀龍辯
當年四案正論危言扶植千秋名義最大尋告歸後
改太常少卿不赴擢工部右侍郎以祖父母未邀封
贈一出甫三月見權璫當道國事日非遂請致仕逆

璫惡之屢欲加害未能也通籍四十年什九在告家
貧布衣蔬食出則徒步所居老屋數椽薄田兩頃不
殊寒暖仰承父志去官而家去城而鄉青鞋布襪以
奉杖履撫胞弟茂德極其鞠養居恒論學以洛閩爲
正宗以守身爲切務所交惟東林諸君子皆白首不
渝終歲扃戶不出嘗有詩云涉世幸逃三見黜歸田
喜遂一閒身其自寫至矣方魏忠賢亂政熹宗未有
嗣長洲姚希孟赴京師茂才告之曰君行矣好語諸
公宜思其大者請信邸出閣講學此今日本計也其

愛君憂國之心如此。崇禎初方起召用。已卒矣。年七十二。著有見聞錄。旁器錄。八貞女傳。興至吟等編行。世學者稱閒適先生。

外史氏曰。先生介然特立。衣冠不正。望望而去。如伯有。然平易近人。勸掖流俗。下至乞兒。皆可相親。如柳下惠。半世曹郎。在在盡職。歟。歷風波。不罹黨禍。如申屠蟠。析理論事。一字必嚴。不好爲渾語。以居寬大之名。如程伊川云。

許世卿傳

許世卿字伯勲。無錫人家。貧有志操。天性孝謹。父早亾。事大父有禮。步趨無尺寸軼事。母至孝。爲諸生有聲。受知郡邑。絕不干以私。萬曆乙酉舉於鄉。淡然自若。服食居室。不稍變其初。丙戌從公車。還爲幽居。十戒出入。恒指而自問曰。若得無食言否。或以私嘗之。輒指其壁謂曰。此吾之息壤也。可奈何。所居敝巷。閉門不啟。守令下車。一謁後。不得再覩其面。郡守歐陽東鳳延請修郡志。以東鳳端人也。一出應之。平生交

遊絕少見小人如目中刺嘗曰和風未學由由惠清
節寧希望望夸每自東林講學歸敕其子曰人何可
不學但口不說欺心話身不做欺心事出無慚朋友
人無慚妻子睡無慚夢寐乃爲學矣五上公車不第
庚子冬行至桃源河冰堅遂返謝去傳金自號早白
老人矢終焉之志嘗於隙地手藝菜甲曰不如是何
能無求於人清苦自甘晚而益窘客有持橐金謂曰
此物易公片楮耳乃直視曰當謁客竟出門去不顧
有親黨坐法者來告急世卿適鬻一婢代爲輸罰鍰

終不爲緩頰其刻勵如此疾革囑其子曰吾有某遺
未償某施未報某家人賚未給某故人子典田所入
已當其直亟取券還之儵然而瞑時年五十未仕而
卒著有中解編太元元言露穎編諸集而特好爲詩
一切欣惋悲愉之感悉發乎詩詩成抱膝長哦輒復
歡然自得學者稱爲靜叅先生

外史氏曰今之所謂孝廉者文詞而已何嘗知所謂
孝所謂廉也先生之舉孝廉可謂不負其名矣至於
易簣時語非真道學不能也嗚呼

吳桂森傳

吳桂森字叔美無錫人幼有至性父喪哀毀如成人長從顧憲成高攀龍講學萬曆四十四年以序貢應廷試後遂絕意仕進急歸過毘陵學易於錢一本每玩一卦輒進而請正盡發其扁歸時一本目送曰吾易在梁溪矣爰就管見象抄廣其意作像象述天啟初高攀龍出山延主東林慨然任之已而攀龍予告見東林四座弦歌心竊自喜尋璫難作攀龍死止水桂森哭之慟竭貲以佐費官旂時書院已毀乃約同

志鄒期楨期相兩兄弟就業道南祠已而相勗曰平
陂往復天道之常吾輩但當爲所能爲以待天之自
定乃集真儒一脈敘道學淵源而以關中馮從吾爲
道脈之合焉璫敗有表章書院之旨亟謀興復建麗
澤堂又構小齋名來復講易其中羣儒翕集其說易
也謂乾坤成列而易行乎其中坎乾來主坤也人心
之誠也震誠之動艮誠得主也離坤順從乾也人心
之明也巽以入之兌以說之自誠明自明誠非誠與
明乾坤或幾乎息矣又嘗正王守仁無善無惡四語

曰有善無惡性之體有善有惡意之動知善知惡是
格物知善無惡是致知聞者以爲名言晚年做義門
鄭氏家會及五經會聯屬宗人子弟以爲常其自署
曰東林素衣所著像象述外有金針易說談易隨問
真儒一脈尚書說春秋大全纂禮記訓釋等書行於
世

外史氏曰余讀先生像象述一書知易之有理有數
有象焉今訓詁家但知講理融通而已而不知象數
之寓於理中微先生易其藜蕪乎

張大受傳

張大受一名夢時字伯可別字弦所無錫人少穎異
隨父大叅澄齋公讀書貴州署爲文超軼不羣萬曆
癸卯舉於鄉屢上公車不第謁選授安吉州知州爲
治大得民心甲子元旦劇盜葉朗生餘黨殺長興令
石有恒將犯安吉夢時率士一戰而寇大敗四境糶
寧民苦解絹請上臺易爲官輸民甚便之尋轉常德
同知署府篆再署司李賢聲茂著以監偏沅軍有功
薦陞山東鹽運使同知寬商恤竈國課無虧及沿海

告警。竭守禦之策。民賴以安。一時有循良之目。將有殊擢。竟告歸家居。講道東林。刻有會講商語。蒲榻笑拈二編。晚年嗜學益甚。日讀書寸許。雅好書法。日揮數幅爲樂。案頭惟存彭澤香山明道康節數卷。以當尙友。卒年七十八。

外史氏曰。先生七歲工對偶。九歲能詩。侍塾師坐一書樓。手題云上。此樓來一動一言。務遵聖訓。下此樓去一事一念。務慊親心。其幼時志已不同矣。年十五以縣試第一補諸生。久困場屋。入太學。四十後始登賢書。其後奮志東林。得諸賢切磋之益。卓然稱有道者焉。

陳仁錫傳

陳仁錫字明卿號芝臺長洲人年十九舉萬曆丁酉
孝廉時文習衰靡慨然以倡明理學爲己任究切經
術所爲文不屑西京以下屢上春官不第天啟壬戌
始成進士廷試一甲第三人授翰林院編修丙寅充
日講官在經筵多所規正每以進忠直遠奸佞爲言
時魏忠賢用事方芟夸善類聞仁錫言惡之會忠賢
言軍功累爵上公給鐵券仁錫當視草辭不可忠賢
密使人謂曰屬草則台座不則刀鋸奚擇乎仁錫曰

吾腕可斷草不可屬數日卽有孫文豸以誦步天歌妖言亂政見捕詞連仁錫及文震孟坐以東林謀主震孟先已降調里居以池陽救得免逮而仁錫遂削籍歸當是時朝士奏對稱上公而不名伏謁呼九千歲宗社大命懸於絲髮仁錫以一書生抗拒直揭一代綱常還之君父其關於世道人心者不小也崇禎初起原官稍遷中允再補日講出宣詔三韓齋油素記阨塞甚悉爲小冊可當聚米也鞭裘之贈一峻謝之又明年庚午署國子監司業所教士以誠敬爲本

是秋充經筵講官所敷陳皆切時務不事訓詁辛未分典禮闈得士爲最秋冊封周藩歸時相惡其不附遂訟於朝曰是門戶後勁也是東林嫡派也科道何爲不逐之遂乞身甲戌三月起南祭酒南雍士子欣然復有南陳之稱南陳謂文定當永樂時統南雍者也亾何疾遂不起卒年五十六贈詹事府詹事謚文莊所著有經濟八編大學衍義續補及賦役漕政水利等輯最大者世法錄一書凡本朝之大經大法祖訓之敬天勤民以迄禮樂兵刑象緯曆律邊鎮方輿

濬河利漕莫不畢具疾作遺命上世法錄於天子曰
臣之報主盡在是已其所學大略如此學者稱芝臺
先生

外史氏曰先生在朝與文姚諸公名節相期道義相
砥乃其時欲陷之者一日東林嫡派再曰東林邪黨
不去之不止者何哉君子曰是天也

東林列傳卷二十三



江陰陳鼎定九輯門人
沈霽載陽
蔡世英偉人
全校

明

文震孟姚希孟列傳

文震孟字文起長洲人弱冠舉萬曆甲午賢書居父
喪哀毀廬墓竹塢三年未嘗見齒有真孝廉之目十

上春官至天啟二年始成進士廷對第一授翰林院
修撰時魏忠賢漸用事因禁講學與黨議正人以次
竄逐震孟上疏言勤政講學之實謂君臣相對如家
人父子則左右近習無緣可以蒙蔽且曰空人國以
常私窟幾似濁流之投罟道學以逐名賢有甚偽學
之禁疏上忤忠賢意乘上觀劇摘疏中傀儡登場語
謂比上偶人激怒上傳杖八十輔臣救免降調未幾
逆璫矯旨削籍崇禎改元復原官充日講纂修熹宗
實錄校對光宗實錄副本請改定三案之誤其在講

筵嘗講君使臣以禮力勸帝培養士氣推心感人勿
徒峻刑法以啟猜疑講罷卽傳旨釋刑部尚書喬允
升副都御史易應昌於獄又講春秋宰咺歸罪言咺
位六官之長而壞法亂紀自王朝始焉用彼相蓋有
所諷也在春坊時疏劾呂純如羅織諸賢今籍奧援
思借邊才起用吏部尚書王永光假竊威柄變亂祖
制考選擯斥清才上命指實具奏永光旋罷歷陞詹
事府少詹事上知可大用八年七月進禮部左侍郎
兼東閣大學士既與首輔溫體仁忤十一月遂罷初

震孟講春秋稱旨已而引疾不允體仁語之日行相君矣何避也其相也值體仁在告出不意驟命之震孟自恃特簡於體仁無所依附始入體仁有票擬必請正有改必從震孟語人曰温公虛懷乃爾何云奸同官何吾騶曰是人機械甚深何可信也越數日體仁知其疎凡震孟票擬徑抹去不用震孟拍案大呼以諸疏擲體仁體仁亦不顧至是震孟吾騶欲以工科給事許譽卿補南京太常卿體仁與吏部尚書謝陞難之陞遂疏糾譽卿震孟票擬奪俸體仁不可震

孟作色擲筆曰言官以去爲榮卽革職無害體仁遂揭此語入告與吾騶俱罷譽卿擊璫有直聲十年不調削籍以去而震孟清勁負時望入相僅三月體仁擠之不竟其用天下惜之十年卒於家福王南立謚文肅

姚希孟字孟長吳縣人生數月而孤其母文氏徵明之曾孫女也希孟父歿文僅二十餘家故貧困於役希孟晬之日縣吏卒將之庭踞堂而嬉人皆憐之或以慰其母曰此兒吉徵也數歲穎悟異常幼卽能屬

東坡先生傳 卷二十三 三
文外祖父元發異之謂其子震孟及希孟此兩孺子皆不凡以故震孟與希孟舅甥如兄弟也希孟性至孝母課督之甚嚴甫成童而業大就與震孟俱爲春秋大師老生宿儒皆自謂勿及希孟師事張世偉而友周順昌朱陞宣震孟弱冠舉鄉試屢上禮部不第希孟久爲諸生年三十四始與世偉順昌陞宣同舉鄉試踰六年遂先震孟成進士執政將選爲庶吉士希孟初以親老辭請於母而後應時學士劉一燝韓爌爲教習師皆深器重之神光之際再值大喪一燝

與爌同時執政希孟左右其間一時名賢布滿朝列給事中楊漣論劾崔文昇侍疾無狀及力主移宮事皆希孟贊決之尋授翰林院檢討時漣以移宮事放歸與希孟慷慨言別矢禍福共之熊廷弼素與東林異而希孟深重其才於其被逮也出郊唁之慰勞良苦且爲白之公卿間其後闖黨借廷弼以誣諸人蓋自此始也天啟二年魏忠賢與客氏漸得志殺王安文震孟始登第卽以言事落職希孟所與遊及其講學者如鄒元標馮從吾王紀等先後去國廷臣以學

爲諱於是希孟亦奉母歸與震孟俱南居住來東林講學二年忠賢焰益熾巡撫周起元謂希孟曰賈彪云我不西行大禍不解公亦有意乎不得已仍奉母入都至則趙南星高攀龍楊漣左光斗魏大中等相繼併黜希孟入朝偃偃且惴惴也居無何甫同考會試而母文氏以病卒於京邸希孟奉喪歸至中途逆璫矯首削籍抵家屏居墓廬絕葷血者三年朝夕哭聲震林木過者聞而悲之七年熹宗崩莊烈卽位誅忠賢逆黨稍斥而柄國者猶持同異希孟與震孟等

未卽登啟事高陽孫承宗貽書同邑閣臣李國樞乃召爲左春坊左贊善尋進右庶子與震孟俱爲日講官時韓爌復出爲首輔奉詔定逆案希孟助之爲多而楊漣左光斗周順昌魏大中等贈謚恩卹彝典備至凡政出自爌者皆希孟力也希孟在講筵四載歷陞詹事府正詹事兼侍讀學士帝亦重之時諮訪政治得失是時周延儒溫體仁方迭用事延儒頗善希孟欲引之而體仁深險忌希孟英果時思以事中焉會庚午順天府鄉試希孟與姚恭明爲考官誤取武

生三人武生例不當入闈然責在提調於考官無與也體仁欲歸咎希孟乃票旨命覆試武生而以文字苛繩之遂謫希孟以少詹事掌南翰林院希孟既去猶時謫其講語於帝前懼帝復用之也蓋體仁之忤刻如此希孟至南京得疾請假歸歸二年而卒震孟入閣僅三月體仁亦以事逐之震孟歸而希孟病矣舅甥執手榻前依依靡間希孟卒甫十餘日而震孟亦卒

外史氏曰文起在朝席不及暖而卽被逐孟長入朝未久亦卽被謫夫天未欲存明也故使其舅甥歷坎坳焉天欲存明豈肯使之遽亡哉

許士柔傳

許士柔字仲嘉常熟人幼聰慧父伯彥課授十三經孫吳握竒經諸書諷誦皆上口踰年卒業鄉黨父老皆驚異之萬曆末舉應天府鄉試天啟二年成進士選翰林院庶吉士四年授檢討持節冊封楚王以父喪去崇禎初服除陞侍講纂修神熹二朝實錄管理誥勅歷陞中允諭德後爲左庶子掌左春坊事先是熹宗時魏忠賢擅政群小持門戶異同喉忠賢命諸史臣輯三朝要典辯挺擊紅丸移宮三案伸邪說毀

正論復改修光宗實錄削其與要典牴牾者莊烈初元用中允倪元璐言燬要典而所改光宗實錄如故少詹事文震孟疏抉摘之是時溫體仁當國與王應熊皆附會邪議者意難之震孟疏入錢士升爲次輔擬諭禮部詳核同異帝御平臺手出震孟疏辯明三案是非帝力闢要典邪說體仁懼其改實錄也陰沮之曰事久經聖諭申飭便可垂示萬古於是奉是非已明不必議改之旨應熊所擬也士柔憤然曰若是則要典猶弗焚矣乃上疏曰臣備員纂修恭閱皇考

實錄總記於世系獨畧皇上娠教之年聖誕之日不書也命名之典潛邸之號不書也聖母出何氏族受何封號不書也此皆原錄備載而改錄故削之者也原錄之成在皇上潛邸之日猶詳慎如彼新錄之進在皇上御極之初何以率畧如此夫臣同官震孟所言是改錄所筆者也筆焉而不信天下萬世猶得按其說而正之若臣所言是改錄所削者也削焉而不書是使聖朝父子母后兄弟之大倫皆闇而不明缺而莫考其於信史謂何疏上得旨謂累朝舊例不必

滋煩體仁復令中書官捧穆宗總記以斥士柔士柔抗章爭曰皇考實錄與列聖條例不同列聖在位久登極後事編年排纂則總記可以不書皇考在位僅一月登選三后誕育聖躬皆在未登極之前不書之總記將於何書也穆廟大婚之禮皇子之生在嘉靖中故總記不載至於冊立大典編年未嘗不具載也皇考一月易世熹廟之冊立當書皇上之冊封獨不當書乎體仁怒將劾之同列沮之而止士柔復上疏曰累朝實錄無以不書世系爲成例者臣所以抉摘

改錄正謂與累朝成例不合也孝端皇后皇考之嫡母也原錄具書保護之功而改錄削之何也分莫尊於正嫡功莫大於保聖當日國本幾危幸天心有所付託坤寧調護真孝慈之極則顧復之深恩史官不難以寸管抹殺之此尤不可解也疏上報聞如故體仁滋不悅會體仁忌倪元璐嗾誠意伯劉孔昭劾之并及士柔族子重熙私撰五朝注畧事將連士柔士柔懼亟以注畧進御帝覽而善之事得解尋出土柔爲南國子監祭酒體仁去張至發當國承體仁指謀

逐士柔高攀龍之贈官也士柔爲行誥詞故事制誥皆屬詞臣惟贈官誥文屬誥勅中書職掌崇禎初褒卹諸忠誥詞皆出詞臣手蓋諸家子弟請之中書以爲侵官故深恚時攀龍誥軸未給至是其家請補給仍以士柔所撰詞進帝方申飭言不得用駢儷語中書黃應恩摘制詞語告至發至發喜卽以撰文違制劾之遂命鐫二階調用司業周鳳翔爲抗疏辯曰詞林故事閣臣分屬撰文或手加詳定或發回竄改未有徑自糾叅者也誥勅用寶歲有常期未有十年之後用寶進呈吹求當制者也贈誥專屬中書崇禎三年所申飭未有追咎元年之史官詆爲越俎者也高攀龍純修正學皇上翦逆褒忠一旦毛舉細故舞文反使忠良色沮奸逆軒渠非所以勵當今示後世也疏雖寢不報公論韙之士柔尋補尚寶司丞遷少卿以卒子琪詣闕辯誣狀請復本官帝許之仍贈詹事府詹事兼翰林院侍讀學士士柔倜儻善應卒頒詔至南京中官運皇木梗道從人勢張甚士柔奉詔書鵠首已朝服侍其旁中官色沮叩頭去

東林列傳 卷二十三
外史氏曰余讀仲嘉先生傳知體仁至發果魏璫之義兒也不然玉汝文起兩先生欲改正實錄而體仁輩陰沮之者何耶嗟乎體仁輩直犬豕之不若矣按吳興席帽山人筆話載體仁與至發未顯時曾貸黃金各製飲器晉魏忠賢下鐫其名以父事之余猶以爲惡之之辭耳及讀筆記諸書乃知席帽山人之不謬焉

成勇傳

成勇字寶慈樂安人七歲記萬言性端介喜聞箴規惡嬉戲人號爲成子路讀太極易通有會謂理學在實踐不在空言天啟元年鄉試第十明年會試策引宦官仇士良爲戒主司歎曰戇哉又三年成進士方是時逆璫魏忠賢橫甚諸新進諷勇同往謁勇愕然曰吾儕進身始未能折檻陳言除兇監顧乃媚閹人要榮恥矣堅不往授饒州府推官媚璫者屬勇謂鄒元標東林黨魁也往當困挫之勇不應至則造元標

盧請業焉。會中使承璫差馳浮梁冶場冶器過饒知府率僚佐郊迎。勇不可中使怒索供具。詳知府群吏走匿。郡騷動。勇坐廳署遣吏捕中使諸從役。笞之中使走。署恚曰。有旨。有旨。勇曰。旨採器冶耳。詎辱二千石。鞭長吏。豈亦旨耶。中使踉蹌去。誓曰。不愬上公。撲殺此吏。有如日。勇聞之。恬然。亾何崇禎改元。璫誅。獲免。凡三爲理官。所至出孝經小學及先儒語錄進屬吏郡之士大夫。發明其義。曰。吏治以講學爲先。任歸德。冬月衣單袷。有以貂裘進者。峻却之。流寇數十萬。

圍城下。衆崩噪。勇乘城誓衆曰。宋州古睢陽。張許風猶在乎。今日勝則生。不勝則死。死生皆臣職耳。率衆擊賊。賊大敗遁去。舉卓異第一。考選翰林。五日給事中。陳啟新沮之。啟新者。故以武舉躋言路者也。時帝御平臺。咨群臣時務。楊廷麟等稱勇才品。帝動容。改南京監察御史。會黃道周疏。叅楊嗣昌奪情。櫻怒。不測。勇上疏申論。辭甚峻。同官止之曰。覆車不可鑒乎。勇曰。講學。先明倫。明倫。先事父。爲人子。而不知父。又寧知有君耶。此不言孰可言者。得旨。逮繫勇。就道太。

學六堂生率數千人集江干哭送之下獄嚴鞫主使
初訊曰天地鬼神主之再訊曰二祖列宗主之三訊
曰周公孔子主之坐繫者三年日與道周以孝經易
傳相辯析作詩遞唱和會大震電肆赦遣戍浙江寧
波衛劉宗周張瑋汪偉等先後薦牘數十上起福建
道御史不就隱居十五年獨處一小樓署一聯曰萬
里風光樓上眼千秋事業榻前心著有程易發西銘
解崑崙洞語錄諸書而卒偕勇隱者鄉人張貴吾慷
慨言事多奇中從勇游患難不忍去共棲雲龕中好

言仙一日寒風冽冽雪滿山谷勇與貴吾踏雪行望
叢棘中一物徐視之則人也乃開目顧兩人曰公等
來何遲取相與坐樹下移時勇叩其名曰吾肅宗朝
小吏耳見一顯者臨刑心痛楚不自得遂逃入此山
中辟世因欲授勇導引法勇辭之曰子入山逃死吾
入山待死耳士各有志不相謀也其人笑曰又三年
清明之前一日其從楊左諸君歸來乎勇作雪中人
記之至是果卒

外史氏曰理學者洵在躬行實踐不在空言也先生

東林列傳 卷二十三 三
歷仕宦履艱危。一皆身體力行。至死未嘗少懈。可謂
得理學之實者矣。

呂大器傳

呂大器字先自四川遂寧人。崇禎元年進士。授行人。
六年擢吏部稽勲主事。歷考功文選郎。以終養乞歸。
張獻忠自楚流入蜀。大器以邑城庫倡士民修築。賊
過天星等經遂寧。見城堅不可攻。引去。大器慮賊復
至。募土著習弓弩火砲。撫按上其事。詔加一級。十一
年。例轉陝西關南道叅議。明年陞固原副使。西安有
劇盜穴長武山中。巡撫丁啟睿檄大器馳剿。大器用
穴地火攻法。盡殲其衆。十四年。調湖廣驛傳道。叅政。

旋擢右僉都御史巡撫甘肅甘州總兵柴時華者與前撫劉鎬郅賄鎬已復威脅之縱兵大譁至焚其臺門鎬返所予賂加倍乃止鎬坐是罷去以憾死大器入境密陳時華諸不法狀請移之涼州已得旨奪時華秩以副將王世寵代之時華既解印忿之欲爲變會其部將坐法當逮給時華曰朝廷且逮君新撫軍陳兵涼境矣時華惑之帥親軍千餘出甘州保所築私莊遣使齎金幣結土魯番爲邏者所獲鎮道馳報大器亟遣兵捕之以其事聞時華拒戰十餘日大兵

日集土魯番不至親丁多降者時華知事敗大呼曰我誤聽人言至此欲逃死安所乎命舉火閭室自焚死時華西寧人世爲將其下多死士叛聞之日舉朝震駭不十日捷至帝大悅十五年名爲兵部左侍郎明年總督保定軍務周延儒以首輔督師軍潰諸將多陷沒惟保定軍獨全詔分別行間功罪晉秩一級是年夏張獻忠破武昌調大器應皖江楚總督命總兵李輔明馬科各以四千人聽節制時南昌告警遣部將謝騰雲李士元及左良玉兵遏賊於樟樹鎮大

破之十一月復吉安及廬陵吉水十二月復茶陵醴陵奉詔與良玉平賊十七年正月調南兵部副尚書史可法治軍留都李自成犯京師可法帥師入衛大器署部事莊烈皇帝凶問至南中洵洵議立君未有所屬福王潞王皆避賊至淮上大臣意多在潞王鳳陽總督馬士英貽書言福王神宗之孫序當立魏國公徐弘業等集議朝內大器時兼署禮部主潞議不肯署右都御史張慎言詹事姜曰廣皆然之方列福王不孝不弟等六事貽可法及士英而士英已與南

竄總兵高傑劉良佐劉澤清等歃血立福王矣連兵江北大臣畏之不敢違乃以福王告廟五月王監國南京尋卽位士英入輔政出可法督師淮揚大器改吏部左侍郎給事中李沾以擁立功陞太常寺少卿疏劾大器定策懷二心大器乞罷不許六月士英薦阮大鍼可任樞貳予冠帶名見給事中羅萬象御史陳良弼大理寺丞詹兆恒等交章言大鍼以欽案擬戍不宜召大學士高弘圖請下九卿議與士英不合求去大器抗疏劾士英挾重兵入朝覲留政地其子

乳臭而都督妹婿手不寸鐵而總兵瓜葛之越其杰以軍犯而監軍附逆之田仰以久廢而侍郎逮問之楊文聰以抗提而職方膽大心雄目無法紀又云吳牲鄭三俊等臣不敢謂其無一事之失而清直剛介均係海內士民之歸馬士英阮大鍼輩臣不敢謂其無一技之長而貪鄙儉邪終爲宗社無窮之禍語極切直不數日劉澤清入朝極詆東林遂劾大器爲東林衣鉢真傳前撫甘肅以私忿殺總兵柴時華及受賂諸事大器連章引疾遂以原官致仕初大器佐南

樞堅主立潞議與時忤至是慮後禍以親書告廟祝文送內閣其謝表有云赤睂銅馬合湊而糜爛神州檜賈溫敦接踵而橫居津要蓋指士英大鍼也末又言臣自此雲遊遠涉恐當事者誤以姓名遠瀆天聽致形踪無獲臣不敢不預爲請明人頗疑其橫九月李沾復疏叅大器懷挾異心阻撓定策遂奪職命法司逮問大器已間道走柳州明年我師下福建執唐王廣西總督丁魁楚巡撫瞿式耜與大器等定議立永明王由根監國肇慶晉大器大學士兼兵部尚書

與魁楚同典樞務內監王坤自閩至以司禮竊國柄魁楚深相結遂入相大器心惡之又與魁楚爭戎政不協屢引疾會永明王西出自請畱守遂辭去由梧趨韶再至梧復返柳州入蜀召之不出先是偽將劉蔭率兵三千人歸永明王至是相傳王已死楚宗人朱容藩據夔州自稱監國諸將皆賀大器抵遵義守將王祥郊迎容藩亦使人以千金來迓大器北行過李占春營具言永明無恙容藩僭竊不宜受其爵號占春然之不復事容藩後敗走忠州爲追兵所殺王

祥綦江人素勇悍爲九圍子監官張獻忠之亂據有遵義諸縣自稱平寇伯晉忠國公後爲孫可望所敗自刎死嘉定人楊展起家武進士亦據嘉定犍爲遺民潰賊皆歸之衆至數萬人時蜀大饑父子相食展遣使告糴黔楚自縉紳以下至弟子員皆資給農民與牛種口食使擇地而耕願從戎者補伍百工雜流各以藝就食孤貧無告者廩之於是蜀賴以全活雄視一方自稱華陽伯顧性矜尚文墨不務攻戰至引賊自助卒爲袁韜武大定誘殺併其軍袁武張獻忠

故部曲也大器思用蜀人既歷諸鎮深爲太息謂總督李乾德曰楊展志大而疎袁韜武大定忍而好殺王祥庸懦不足仗蜀事其可爲乎遂之黔至獨山州疽發背卒葬遵義之九龍壩

外史氏曰先生以曠日直矢之軀而與群奸同事無異麻生蓬蒿中也安能一日容其直哉卒至安不終日而又皇皇奔走於苗蠻爨燹之中希一申大義於天下至於死而後已亦可哀矣嗟乎此皆東林人物也誰謂東林邪黨哉

金光辰金九陞列傳

金光辰字居垣滁州全椒人崇禎元年進士授行人督餉寧關諭止譁兵之亂擢監察御史巡視西城獲營兵爲盜者七人立誅之輦下肅清內使周二以姦殺人卽移司禮監往捕周方值御前被收乞哀帝曰御史所執者祖宗之法朕何敢私卒抵罪由是益有聲六年命視太倉庫尋兼理新餉及節慎庫時流寇大亂中原用兵新舊餉增九百餘萬吏叢爲奸帝用軍興法誅後期者不能應光辰請定條例鈎考事得

就理。五月京師大風電上言崇治體課實行明功罪預國儲端化原廣言路六事會給事中章正宸以糾新輔王應熊下獄具疏救之引陽城沮裴延齡呂誨論王安石爲比不聽。明年八月帝御平臺賜諸大臣筆札令舉堪任吏部尚書者吏部左侍郎張捷舉原任尚書呂純如帝曰此逆案中人也科道官云何光辰與御史韓一元等面斥其妄退復疏論純如之奸及捷乘機起用借題翻案之巧事遂寢十一月奉命巡按河南值歲饑全秦流寇盡趨而東商雒伊汝浙

鄧之間賊騎充斥光辰間道兼程以進謂豫鎮陳永福兵寡不足恃請以左良玉鎮河南而調曹文詔張全昌等分馳夾擊以壯聲援會良玉擁兵不進卽疏劾之諸將皆奮已而全昌破賊於許文詔追賊於隨州祕陽皆大有斬獲賊兩逼歸德使祖寬陳永福祖大樂等先後擊走之乃請蠲賑被災州縣數十處民賴以甦河南府推官湯開遠者奇士數有功光辰會薦於朝使監良玉軍嗣以建言被逮立奏釋之使辦賊光辰雖不典兵而善鼓勵將士凡地形險易兵力

分合及剿撫機宜皆先期入告受事十五月疏凡至百餘上事竣還朝以疾乞休不允值邊警命分守東直門見時事日非陵京震動憤然上疏劾首輔溫體仁誤國又論督師楊嗣昌不職當逮問適兵部侍郎仇維禎奉命出鎮通州請畱內臣杜勛爲監鎮光辰復劾維禎身膺重任一籌莫展而先擁戴中官又摘其疏中如失怙恃等語以爲羞士類而誤封疆頗極醜詆而帝方倚任中官越四日命九卿科道錦衣衛官俱至召光辰入出疏詰責甚厲光辰直趨榻前辯

對不稍屈帝恚甚將行廷杖會是日風雷大作雨如注殿廷晝晦懼而止命刑部議罪先是光辰同新寧侯譚弘業駙馬都尉鞏永固給事中張元始等守門忽聞召光辰衆疑將就獄皆錯愕失色元始對之出涕光辰顧笑且去禮科給事中馮元飈荆祚永密繕救疏伺不測則立進之良久見光辰出左掖門皆大喜爭往迎問光辰徑詣門上無所語張給事見而歎曰雷霆不懼寵辱不驚君其兼之矣然終以忤體仁部議降級有大璫使人招光辰曰皇上每言金御史

才可大用。但性急耳。願一詣我可免也。光辰使人隔垣謝之。卒得降。以去工部侍郎劉宗周方假歸在道。具疏力爭。亦奪職。光辰在謫籍三年。復召爲大理寺丞。累遷至通政司左叅議。會有旨起廢。卽薦陳必謙許譽卿周鏞金鉉楊廷麟張采王相說詹爾選范景文方震孺金聲等十一人。時崇禎十五年也。五月帝以鳳陵重地。恐重被寇掠。欲以總漕都御史史可法改督鳳陽。令諸臣各陳得失。光辰進曰。鳳督誠宜。易若使易以漕臣。是欲急而反緩也。今闖曹已破歸德。

歷數程則逼淮。革左獻忠盤踞英六。歷數程抵揚。萬一二賊相合。漕臣乃欲從淮上以救二陵。則已隔在外矣。帝曰。何謂在外。曰。潁亳接壤河南。過壽州則爲鳳陽泗州揚州。此河南賊來之路也。廬州旣過。則爲全椒六合儀真揚州。此舒廬賊來之路也。今賊在河南及舒皖間。若以數股由徐至淮。以數股由廬至揚。兩道交堵。聲援斷絕。漕臣豈不隔在外乎。帝曰。光辰言是也。朕按地圖亦如此。未幾遂陞都察院左僉都御史。時帝方以劉宗周爲左都御史。張瑋爲副都二

人同時被召臺中謂之三正閏十一月復召諸大臣對中左門令速議督撫去畱語次諸臣遽請釋姜埰熊開元不聽劉宗周復申救之抗辯良久帝怒命候旨處分光辰進曰宗周之救二臣非爲二臣起見也無非欲皇上爲堯舜之主廣納言之美耳主聖則臣直一時不識忌諱語言過戇乞賜優容帝曰開元此疏定有主使必宗周也光辰曰宗周賦性硜直賓客不通二臣之事卽宗周亦謂其不能無罪但在御前不覺以忠愛之心披納瀟之益實從君德起見且宗

周在事百務整理卽近日皇上所頒憲綱日與諸御史申飭奉行前者同臣察理城守不避風寒其實老成可念帝曰金光辰亦著議處光辰復奏臣忝司風紀竊見宗周爲人其在臺中卽不動聲色人心亦肅若皇上畱此老臣不但舉朝有所觀感卽薄海內外臣民無不悅服如有一字之欺臣願甘斧鑕帝命光辰同宗周先出候旨宗周奪職光辰降三級調外自是臺中遂無人光辰亦再疏終養以父憂歸廬墓山中十七年三月闖賊逼京師光辰墨縗與禮部郎周

鑣武德兵備使雷續祚糾義旅勤王旣聞城陷帝崩走南都哭臨三日卽歸墓所五月福王立江南馬士英阮大鍼等當國以東林羅織諸正人與大獄鑣及續祚皆遇害日遣厥衛卒伺光辰遂攜家避居丹陽湖不仕而卒光辰清操直節不下宗周生平對君告人無稍委曲朝士目爲金赤子其論温體仁楊嗣昌與內侍杜勛皆與帝意忤蹶而再起復以救宗周去及體仁以主使斥回嗣昌敗宣雲之失杜勛八駟迎賊而京城隨陷權奸閹寺之禍竟悉如光辰言

金九陞字允訥光辰叔父也光辰嘗受業焉爲人博學慷慨好持大節領萬曆四十三年鄉薦久不第授經山中滁人皆嚴事之因過逆璫祠不下車巡按劾之罷去崇禎初起知棗陽縣始至卽辨疑獄禱雨滅蝗民驚以爲神時流寇方肆虐楚中戕州縣以數十計棗故介襄承之交西渡豐樂河東踰隨州温峽口皆距承天顯陵二百里爲極衝九陞增陴濬湟挑其邑中壯士得四百餘人授以兵仗造勁弩毒矢爲戰守計邑有鑪杯堰阨塞也率衆馳往築土城鑿濠引

水環之伏壯士其中爲縣城聲援而自以民兵擊賊於鹿頭店射傷其渠帥順天王遂破之賊凡十餘至終不能踰棗而南助陽巡撫盧象昇疏其有護陵功擢南光祿寺大官署正轉戶部主事已而寇大隊掠廬鳳間烽火連數百里游騎逼江上南兵部尚書范景文急使九陞監浦子口倉護軍餉浦口城小而樓櫓不備乃多築墩臺積躡口礮具人持毒弩畫堞而守之賊知有備引去以功轉本部郎中權稅杭州升廣西蒼梧兵備副使大破猺賊於鳳凰山威望益著

時崇禎十四年也明年奉表入朝帝召見慰問賜銀幣復遷湖廣上荆南道而鄖襄已陷楚中盜賊蠡起九陞間關赴任稍收復諸城邑撫定劉荒保燕子窩諸賊悉有功會三省合勦八排猺崗復以監軍治餉務事平總督沈猶龍薦九陞才將會推戇南巡撫而九陞年已七十矣病不能赴歸一年而有甲申之變以憂卒論者悲之

外史氏曰思宗朝有材而不能用用而不能任任而不能久蓋由群小叢集而不使正人一吐氣也兼之

東林列傳 卷二十四
海神元颺移牒曰神無功德於民而南面設仗如王者僭非法聚薪將焚之既而澍降有米艘稅數千元颺悉蠲之爲輸助資忤璫罷歸崇禎初擢戶科給事中首請停天下增賦百四十餘萬又疏論錢法五弊謂臨清山海九邊等處宜聽人輸銅如中鹽例設官鼓鑄而統其事於兵部則邊餉易給將卒皆可彈壓矣時楊嗣昌督師山永上平賊策請天下有礦處聽民開採以散賊衆元颺廷折之曰此乃聚賊何謂散乎及嗣昌在閣部糜兵餉無算上一日以賦紬爲憂

元颺曰此兵戶不相核耳卽如勦餉一事初擬用兵十二萬故措餉二百萬今所報兵數不滿八萬則溢餉已百萬矣誠欲覈餉不如覈兵上爲竦然元颺在垣中久遇事奮發其所批繩當路若周延儒溫體仁王應熊輩侃侃不少借十年東宮出閣預選講官六人官諭項煜編修楊廷麟疏讓黃道周內閣張至發怒其沽名遂出揭言之奉有矯讓之旨元颺抗言道周疾俗已甚閉門却掃人皆重之特以數忤執政引嫌褻足而東宮講讀二臣獨能篤信舉知退然自下

正使其言不必用。自足俯勵。未俗增輝。盛典爲大臣者。宜深嘉歎。風勵百僚。而閣臣一揭。若大不快於其言者。乃并遷怒。道周臣恐。天下後世有以議閣臣之得失也。疏出。人多避之。然忌者益衆。久之稍遷。太常元颺屢請外。遂出爲南京太僕寺卿。陞通政司。召入爲兵部右侍郎。時天下事日壞。將卒偷不可復使。邊帥起債倍於曩時。自元颺佐樞。而訶事者數懷重賄。探之。不得其門去。故上以是信元颺。而元颺實積勞善病。方爲都給事。時嘗侍文華殿。忽踏仆折齒。上

惻然命糾儀者勿問也。然以世恩遇。主知自矢。盡瘁十五年。秋。上旣誅長壽陳新甲。顧廷臣無可任。樞密者。一日召諸大臣。並馬遊西苑。賜宴明德殿。元颺時以左侍郎攝尚書。與焉。旣下馬殿前。上臨門南面立。閣臣班於階。諸尚書立階下。上命元颺前。元颺以位次不敢越。辭。上曰。無嫌。再命前。乃進。叅諸閣臣。次上握元颺手。語曰。知卿固世家。祖父兄弟受國恩。宜善自力。元颺頓手謝。宴畢。因論兵事。良久。出御馬。佳者百餘匹。及內製火箭。次第示元颺。元颺爲辨其良楛。

上曰大司馬缺久無踰卿者元颺以多病不任劇遜謝久之既疾發乃舉劉餘佑攝部事又舉張國維上用國維尋罷去卒用元颺爲兵部尚書而用倪元璐爲戶部尚書兩人素相得又皆以經濟負天下望至是同日命下中外相慶上聞之喜甚語於朝曰昔堯命四佐舜舉五臣朕得此兩人不爲少矣而小人大忌之謂東林再出門戶愈勁而天下事壞矣攻之者甚衆一日元颺至戶部堂與元璐聯坐面令吏書對簿吏書半匿不敢出元颺呵責之元璐以是得汰尺

籍浮餉三百餘萬耗蠹之費一時爲清元颺乃請自各軍副將而上由廷推叅游而下督撫薦舉於以核成無旁溢使上從之而兵部請寄賄鬻之費亦於是盡矣當是時上倚元颺出輔臣上有密旨一夜嘗數發元颺亦慷慨誓破賊乃請以督師孫傳庭堅壁潼關總鎮左良玉堅壁襄陽西則應蜀北則扼闖東顧鳳皖鳳皖之兵扼淮保定之兵扼河剋期會師戒勿浪戰俟賊饑困聯絡土寨漸蹙而取之廷臣多言不戰則賊益張兵久易懦元颺謂將士習懦益久未經

行陣宜致賊而不宜致於賊自遼難以來催戰覆轍
可爲殷鑒一日質爭於上前曰皇上若必以戰遲速
爲利鈍請先下臣獄俟一戰勝斬臣謝之耳上無以
奪也而廷臣猶力請不已將以逗畱爲督師罪元颺
手書與傅庭戒毋輕鬪且示白高兩將不可任元颺
旣謝病傅庭撓於衆議趣出關中兩將先逃師遂大
潰而是時我兵方攻山海關朝議倉皇欲檄天下兵
元颺強起入見曰賊若據河北密邇三輔則憂在旦
夕今獨恣飭關內急使河北軍衛三輔毋事紛擾爲
也已而元颺病益劇上賜瓜果遣醫診視咸云不可
治乃允歸元颺因舉都御史李邦華南兵部尚書史
可法自代而廷議乖刺卒用張縉彥元颺謝病出都
不數月而都城破元颺聞烈皇帝之變與兄天津巡
撫元颺以不獲從死爲恨曰夕悲慟九月朔日元颺
先卒越九日而元颺死年四十有七

外史氏曰思宗朝食祿者大都皆爲妖狐之魂所憑
視正人君子之讜言如冷風敗葉之過耳勿聽也狂
吠之聲囂然於國中不虛其社而不輟白谷出關之

戰。余深悲夫。鄴仙先生之言不幸而中也。

黃宗昌傳

黃宗昌字長倩山東卽墨人舉天啓二年進士爲人重名義不苟爲依附初授雄縣知縣時逆璫魏忠賢用事雄近京師故多中官往來有忠賢子姪廕錦衣衛指揮者于政民弗堪置諸理左右詆以危詞宗昌曰吾奉天子法而以奸容耶又中官之黨殺人朝貴多爲解不聽憤曰是其氣焰足以論死况又殺人終令抵罪以能調清苑知縣是時逆璫勢愈張三輔郡縣爭建忠賢生祠如恐不及宗昌言於知府方一藻

故不授工以稽緩之及璫敗清苑獨無祠初璫惡宗
昌倔強欲以東林殺之密使人言於一藻令劾罷而
不果會熹宗崩乃已崇禎元年擢授山西道監察御
史先是熹宗崩於八月二十二日三殿成敘功行賞
於是月二十一日矯旨加銜者六十一人宗昌憤之
入臺班卽具疏言權奸大惡無如矯旨人臣玷染無
如爲官矯旨雖細法所必誅僞官雖賢千載共棄逆
璫弄權竊柄陰謀叵測屏除異己誅鋤善良彼豈一
旦而無忌若是率由懷祿固寵之輩阿諛苟容嘗先

意逢迎遂啟其好大喜功之心因生其矯竊問鼎之
漸如向者寧遠報捷不過敵人解圍自去非能斬將
搃旗復有寸土乃虛張聲勢命爵論功卽朝臣一毫
無與者皆遷官廕予錫幣賚金濫至百餘人國家各
器盡爲逆璫收羅心腹之具然此距先帝升遐之時
尚有旬日雖欺罔擅行猶曰禁勿之事誰敢與知至
於三殿玉成之日正先帝大漸之時豈有安閒出詔
之理縱曰彌畱一息不肯以昏亂示人何不聞此日
名我皇上付托大寶及命大臣申諭軍國重務而乃

諄諄以不急之事加恩於虛糜官爵之人此薄海內外所不敢信也今首惡旣磔羽翼當翦凡加銜陞爵諸臣出自魏氏者皆魏氏官非我皇上官也奧援旣失猶戴僞器以立於堂堂堯舜之朝此亦良心盡失不可以爲人矣又曰臣以新進小臣非不知元氣當培攻擊宜緩第在肆虐之時則宜進保元氣之說以與逆璫抗在今昌言不諱之日邪氣不盡除元氣終不可復疏上奉旨言敘功冒濫久宜澄汰盡著察核以憑裁奪易矯僞爲冒濫則票擬者之舞文也宗昌

再疏爭曰臣前指逆璫矯旨多官仰戴僞銜故舉敘功時日彰明較著者言之非紳冒濫也謂冒濫者固可誅卽非冒濫者而受賞於此時是誰賞之耶亦非糾與殿工無涉者也謂無涉者固可誅卽與殿工有涉者而命官於此時是誰命之耶蓋冒濫之罪猶可寬矯僞之罪不容追臣披肝瀝血以糾大奸閣臣乃以冒濫概之臣竊疑焉得毋閣臣素戴逆璫見臣所刺有隱然心動者耶否則前日所出之旨閣臣與逆璫表裏故見臣疏囁嚅不敢出口耶否則力庇所私

切狐兔之悲耶不然何辨然不侔若是也旨謂矯偽冒濫就中無甚分別倘知矯偽有人何妨指出不必堅爭票擬宗昌曰此奸人廣樹我敵也遂指霍維華黃克績等六十一人疏上閣票果以人數太多不必概詆置之宗昌喟然歎曰人臣立言論是非不論多寡矯偽衆益可憂乃恨多乎由是愈慷慨建白又糾逆黨餘孽張我績等五人又糾智鋌等九人上皆允行而忌之者衆矣二年春禮部右侍郎周延儒夤緣入閣而禮部尚書溫體仁其陰鷲倍於延儒二人交

相妒又交相比也御史任贊化疏糾體仁下詔獄宗昌繼糾及延儒責令回話疏再上衆謂禍且不測會皇子生得免奪俸半年既而體仁與錢謙益閣訟事起宗昌疏糾體仁畱中不下先是楚岷王爲校尉彭侍聖及善化王長子企鋁等所弑其事隱莫能白法司與按撫鞫問三四年莫得要領乃命中官駙馬各一人前往就訊次年命宗昌巡按湖廣方擬會勘聞遵化失守巡撫洪如鐘提兵入援宗昌轉餉給軍移文鄖撫梁應澤督本標兵與洪會又選武襄等處民

東林列傳 卷二十四 九
兵爲殿。又聞鎮算五靖兵素驍勁以其地遠移駐岳州。嚴檄督發其兵剋期以進。兩撫旣出抽調。空虛邊苗柯陳俱思蠢動。又多方安輯之慮。師行餉缺。又具啓藩王助其不給。又徧檄郡縣括新舊贖。餒佐之。又察出黔鹽私鬻。應入官者萬金。催漕米二十四萬餘石。以濟軍需。自冬徂春。心力畢竭於援師。而題報一無溫綸。則當國見忌之故。及勘岷事。盡得其實。復奉旨責問前諸臣失出之罪。宗昌疏糾一道臣一知府一同知受賄庇逆。而上以宗昌失糾於先。降四級調

用忌者意猶未厭。復以清苑逋賦連及宗昌。候訊者十年。會詔蠲逋。乃得釋。十五年冬。卽墨被圍。率士民登陴固守。仲子基中流矢死。明年左都御史李邦華薦之。未及用。又明年三月。京師陷。宗昌聞變。哀號將欲南奔。以土賊圍城。不得出。家居二年。病卒。方仲子基之嬰城中。鏃而死也。妻周氏。妾郭氏。兩劉氏。慷慨同殉。一時稱爲五烈。邑中有王生者。國變。杜門養母。母死。卽自經。遺書告子曰。吾身爲親之子。卽爲君之臣。天地大經。無貴賤一也。我生不辰。當茲酷亂。貪微

生而害義不可以為臣。然親不忍遺。故寧蹈不臣之罪。以養母。服母喪而殺身。不可以為子。然君不忍後。故寧蹈不子之罪。以殉君。是余之苦心。余之大罪也。識者聞其義烈而傷之。王生名義如字御赤。亦即墨人。曾執弟子於顧憲成。

外史氏曰。先生昌言諤諤。以攻逆黨。是高楊左魏之後勁也。使天下知有君子。小人之分者。皆先生之力耳。

劉同升傳

劉同升字孝則。一字晉卿。江西吉水人。少有至性。居父應秋喪。鄒元標來弔。見其哀毀。語人曰。吾儕講學。不如劉孝子之一哭也。時遂稱為劉孝子。云讀書刻勵。以古人自命。文非班馬。書非鍾玉。弗好也。屢困場屋。有謂不宜專力於古者。弗應。久之。至天啟辛酉。舉於鄉。上疏為父應秋請卹典。戊辰再上疏。請易名。賜謚文節。甲戌。刪宋史。期以三年。丁丑。上春。官篋無他。卷攜宋史自隨而已。同行者私竊誚之。是年登進士。

東林列傳 卷二十四 三
第一。蓋思宗特擢之也。在翰林獨行已志。黃道周曰。劉殿撰養其身以有爲。中立不倚者也。然小人輒指曰。此東林之餘波也。將大不利於國家矣。戊寅楊嗣昌奪情入內閣。服緋上任。諸臣交章劾之。俱被嚴旨申飭。同升憤然上疏曰。臣備員侍從。待罪二年。每見皇上至孝。永慕廟祀。致誠頒行孝經。小學風勵天下。臣仰窺淵源。宜弘教化。竊惟朝廷所以爲四方觀望。賴有倫紀。以爲之維也。是謂大經。原本大經。變通其制。使倫紀之立。萬世勿墜。是謂大權。權者。權乎其經。

未有離經而言權者也。是故孝子有終身之喪。而聖人制三年之禮。非過於情之禮。而不及於情之禮也。縱有弗類。必無毀制而忍於情。天性然也。臣於楊嗣昌。有不忍言而不容不言者。敢昧死爲我皇上陳之。臣官吏官也。依阿澆忍。以附閣臣。則愧良史。上負聖明。下負所學。日者策試諸臣。簡用嗣昌。良以國事多艱。焦勞宵旰。如人亟欲疾去。雜試諸君。以冀一效。聖明之用心。亦甚苦矣。都門喧傳。謂嗣昌縶經在身。姓名不祥。非若軍旅。可以凶事行之也。臣所以隱忍未

發意嗣昌亦人子也良心不昧。艾死謂何。必且哀痛。惻怛。上告君父。辭免綸扉。庶幾善體聖意。曲盡輿情。夫邦政之權。亦非輕於揆地也。辭綸扉而掌邦政。亦可效於時艱也。何乃循例再疏。遽入辦事。服緋安忍。叛禮滅親。垂之史冊。萬世唾詈。傳之邊徼。四裔竊笑。以爲國家乏人如此。大臣自處如彼。何以彈壓折服。遐邇之心哉。夫人有所不忍。而後能及其所忍。有所不爲。而後可以有爲。臣於嗣昌以其所忍。覘其所爲。嗣昌之失。而志短也。臣已逆知其後矣。何也。成天下

之事在乎志。勝天下之任在乎氣。志敗氣餒。鬼神矚之。必有非恒之災。動乎四體。病則爲狂。魄已先奪。如此其人。卽欲有所用於天下。而必不能有所用於天下。明矣。嗣昌清夜平旦。試一捫心。何以對其父。鶴志氣餒。敗不知何如。卽廷辯飾。非盡昧本心。而清夜平旦。亦痛心疾首。悔其志之短。而心之失也。嗟乎。彼其之子。自忘其父。而臣猶責之。亦不足責之甚也。且嗣昌自號聞人。豈其見不及此。無奈伎倆。已窮。苟且富貴。兼樞部以重綸扉之權。借綸扉爲解樞部之漸。和

東林列傳 卷二十四
議非他票擬由已。將與方一藻高起潛數輩結連邊
撫。敷同罔功。掩敗爲勝。歲糜金繒。立心如此。何所底
極。獨不畏堯舜在上。共驩難欺。而欲以袁崇煥之故
智用於今日。不見皇上之處崇煥不動聲色。而忽奮
乾斷乎。曩自皇上切責而嗣昌不可以爲臣。今又一
旦忽易墨纒而嗣昌不可以爲子。若猶附和黨謏。緘
口全軀。不惟臣以爲不可。天下後世亦皆以爲不可。
臣不及遠引古昔。近如李賢奪情人望頓失。張居正
奪情身名不終。夫物未有本實先撥而傾折不隨之。

者也。豈非志敗氣餒已事之明証哉。國家亦何賴焉。
當賢居正時。抗言而犯其鋒者。先臣羅文毅倫。鄒忠
介元標。是二臣者。初入班行。直節報主。臣生二臣之
鄉。志二臣之學。當言不言。顏面何施。且臣念及先臣
應秋。而不禁哽咽也。先臣起家及第五載。講幄疏納
忠爭冊立。講冠婚。東封議起。力排和戎。後忤趙志臯
等。遂喉群小。陷以不測。皇考深憐忠直。皇祖特鑒清
操。得免身家之危。卒至憂憤而殞。伏遇皇上登極。賜
謚文節。臣一介書生。欽蒙皇上特恩。親裁進士第一。

東林列傳 卷二十四
寵錫隆盛感激涕零。父母髮膚竭盡思報。臣之一家。皇祖所保全之一家也。臣之一身。皇上所生成之一身也。兢兢勵志。惟恐有負。知遇欲尸默充。位義之所不敢出也。瀝血拜疏。冒犯新命。罪無所逃。然生死榮辱。皆是致身之地。臣亦遑恤其私也。伏乞皇上廣擇芻蕘。折衷典禮。勒令嗣昌終喪守制。庶幾綸扉不玷。倫紀無斁。疏上。謫福建按察司知事。遂至東林講學。月餘而往。壬午召復職。未赴。甲申聞思宗殉社稷。一慟幾絕。卧病吐血卒。所著有詩文二集。刪改宋史五

經四書註大全合編。明名臣傳。明文選。明詩選。文苑英華刪選。金陵遊覽志。音韻彙編。金石寶鑑錄等書。行世。

外史氏曰。先生之劾嗣昌也。義嚴而詞雅。余故具錄其語。以爲後之進言者法。嗟乎。當思宗之朝。賢材不乏也。奈何以嗣昌不祥之失。而玷辱綸扉耶。獨惡嗣昌與石齋先生廷辯。引不如鄭曼之言。以支飾。不特志敗氣餒。其亦喪心凶恥之甚矣。而何可以當國哉。乃思宗不察。反咎石齋者何耶。又恨嗣昌不自量。力

而請督師及至軍中手足無措一籌莫展惟日與門下客以形家言相度山川曰某地葬可封拜也某地葬可科第也某地葬可豐腴也此豈軍旅之事乎督師宰相之舉動應如是乎或進兵機正言則掩耳而不欲聞如有惡鬼附之者安得不凶人天下乎嗟乎志敗氣餒烏足以負荷軍國大事哉先生之言若操左券矣

章正宸傳

章正宸字羽侯會稽人崇禎四年進士改庶吉士以鄉會試俱冠經有名閣臣溫體仁私招之不往出爲禮科給事中王應熊與田戚畹通降中旨入閣不由廷推廷臣莫敢言正宸疏諫曰豈有枚卜降中旨者在皇上出此必爲特用易感恩却衆議則衆絕窺伺顧天下事未有不順人情而可以有濟者也而應熊亦惟非人情故不可用夫徇情與順情名同而實異振作與操切事近而用殊今廷臣縱乏人奈何使傲

狠之夫贊平成之治哉上怒下詔獄鎮撫曰新進安
言耳無他肺腸正宸仰而歎曰新進直言則存之未
妄也時詞臣馬世奇爲解於應熊應熊遽離坐擲茗
椀去及登車乃歎曰壞天下者東林諸公也不殺正
宸無以破門戶之固會科臣莊鰲獻等力疏救革職
既而應熊敗起戶科是時體仁務刻深結曹王諸內
侍毛舉苛細至軍國大事概置不問科道官箝嘿每
諛曰聖朝無闕正宸益以此責望輔臣甫復官拜疏
瀝謝痛言左右茸闕宰執上下皆惜身家保祿位與

內侍相關通名爲線索其言不可聞上親舉筆圈其
疏付閣票旨令通行嚴飭於是閣臣內侍皆切齒曰
此東林之餘孽也不可不急除之值襄陽告警遂充
襄藩冊封欲令賊殺之使事竣復命復以蘓松缺糧
額遣督蘇松糧欲以遲誤殺之又復命乃於十一年
火藥局災進策災之疏直劾閣臣以爲火於五德爲
禮臣象也臣失職則禮教不修故火災今臣之無禮
於君也甚矣夫陛下未嘗以沽名市德疑大臣也而
大臣以揭救錢謙益鄭三俊則先爲沽市之語以嘗

陛下。是無禮也。史莖被劾。而曰時局。夫在唐虞。爲唐虞之時。在桀紂。爲桀紂之時。今在上。何如主。而偶不遂意。則動稱曰時。是又無禮也。在官。無私營。張璠。芳徑。欲借城工。以復銓職。藉非陳啟。新早。爲叅白。則天下。疑考功大法。可金錢。質也。是又無禮也。磨勘試卷。該科職掌。今閣臣。卽舊科臣也。有批抹。而無糾叅。是骫法也。骫法。亦無禮也。諸正宸所劾。皆直指。嗣昌國。觀而上方嚮意。嗣昌因諭曰。輔臣不必苛求。然終躓其言。十五年元日。上朝賀畢。宣閣臣延儒。上殿東向。

長揖稱先生曰。先生其輔朕。朕將端冕以求之。正宸聞之。歡呼入頌聖德。且微責延儒。以巧佞難報。稱累數千言。上深歎賞。呼漢子。而延儒爲正宸會試主考。見其疏。大恨。嘗就正宸。握其手。歎曰。朝廷事。大家可爲。何必執意見。以與物忤。正宸悚然曰。亦惟勗爲大。家事故。不敢徇以私耳。延儒色變。旣而欲復舊輔。馮銓以冠帶銓。延儒主考也。正宸復爭之。延儒大怒曰。吾固無望於汝矣。而欲我亦如汝耶。會上驟用修撰魏藻德。入閣。召對中左門。語不合。延儒遂摭前事。并

東林列傳 卷二十四
責之謂把持枚卜下獄幾不測輔臣賀逢聖疏救之
得遣戍均州十七年三月太常吳麟徵以掌科陞任
薦正宸自代命甫下而京師陷正宸同左都劉宗周
縗經哭杭州責浙撫黃鳴俊起兵勤王而以丁艱歸
廬墓又一年江南下大哭三日別墓逃入深山不知
所終

外史氏曰先生當應熊嗣昌觀國延儒輩群犬亂吠
之時而進以堂堂正論宜櫻不測之禍矣非江夏其
不免乎余幼好黃老術嘗訪道於終南遇先生於鐵

崖嶺幅巾方袍雙眸炯炯靜坐草廬叩其聲越音也
余以爲神仙中人矣因再拜而求長生之方先生曰
噫子過矣道自軒皇設教以來至今存者何人耶老
聃死者也莊周死者也若不見於南華乎一有秦佚
之弔一有門人請葬此二君而死者又何有於長生
乎况子年不滿二十英英之氣逼人盍從孔孟之道
以盡彝倫則孔孟至今在焉其爲長生也與天地同
矣又何黃老之足云余叩首承教立志逃楊歸儒先
生止余數日教以程朱誠敬之學日出則可以致澤

隱則可以獨善。俾虛靈不昧。常存天壤。豈非長生乎。又何黃老之足云。

喬可聘傳

喬可聘字君徵。寶應人。天啟二年進士。授中書舍人。是時魏忠賢勢方張。卽請告終養。崇禎改元。補前官。可聘性儉約。居官謝絕干謁。舉止畧如諸生。同朝惟嚴事黃道周。劉宗周。而親善倪元璐。馬世奇。陳龍正。皆世所謂東林黨人也。中書事少。日夜相切劘。學問講求性命之旨。尤汲汲以政治得失。人才邪正為慮。吏部左侍郎張捷嘗力薦呂純如為本部尚書。帝以純如在逆案中。有旨不許。給事中呂黃鐘遂薦捷。可

聘乃上疏曰臣謹按逆案者陛下所欽定亂臣賊子無父無君之案百世不可改易者也顧臣聞道路之言羣小方輿金載寶謀欲攘臂搯擊乘間以翻此案今觀捷舉純如黃鐘卽舉捷彼倡此和相倚爲奸則前言果大驗矣陽消陰長其害安窮此臣之所大懼也竊謂羣小猶黨逆於溷濁之世而黃鐘獨黨逆於清明之朝捷罪浮於逆案諸人黃鐘罪又浮於捷若不早折其萌則凡在案中者必彈冠相賀耽耽逐逐而來大禍自此始矣疏上可聘聲望大著黃鐘乃外

轉閣臣溫體仁頗畏忌可聘遣所親微諷之曰喬君但到門投一刺臺省可立得也可聘笑曰某區區七品官耳安敢登宰相之堂哉竟不往凡滯留中書者十年始考授監察御史因陳官守言責疏帝嘉勞焉每覽疏中有縈處輒御筆以硃圈之先後共六十四圈宣付史館蓋前此未有也巡按浙江浙中士大夫下訖吏民俱搔首相戒勿犯喬御史其見憚如此可聘爲人恭謹外剛而內和不尚刻礪詭激之行以鈞取聲譽雖與東林諸人還往及其臨事是非可否率

皆直道而行不肯雷同附麗嘗出巡金華舟阻水漲求緯夫不得蘭溪知縣盛王贊持手板立雨中大聲曰杜民方事東作縣令請以身代役可聘立乘肩輿冒雨去人疑王贊必得罪而可聘卒謝薦之在籍右侍郎蔡奕琛故與溫體仁同里相厚善爲東林諸人所惡會有以奕琛私書上聞者下可聘勘報可聘平心決之或勸深文以入奕琛罪可聘拒曰發人私書前賢所恥且某奉三尺法不可故縱獨可周內耶都御史陳乾陽又以私人屬可聘可聘不聽乾陽亦私

銜之遂坐他事降應天府知事累遷大理寺正悉謝病不就福王南渡仍起御史掌河南道印數言宜罷厥衛停燕飲君臣交儆早決大計以圖中興之治皆不省外轉御史黃耳鼎承馬士英阮大鍼風旨疏訐都御史劉宗周所牽連朝士甚衆得旨嚴訐可聘言宗周開誠布公此社稷臣也耳鼎厭薄外轉連章誣罔株引善類非人臣體請以耳鼎所轉瑞昌道換臣爲之事得中止最後上疏論治兵其畧曰用兵有權權在我欲戰則戰欲守則守欲和則和如注矢石於

高墉之上。皆我所得而操縱也。權不在我。譬千鈞之牛。受制三尺之童。彈首而下。之行止不能自持矣。國家殷憂方甚。亦有知今日用兵之權者乎。請先言戰。唐安史之亂。徵兵回紇。是時肅宗親統六師。與李郭收復中原。特借之以爲犄角之助。事已兵休。酬以金帛而已。本朝自罹寇變。徒幸敵寇爭衡。遂致燕雲山左坐視淪沒。此時始欲厲兵秣馬。侈言恢復。豈可得乎。此戰局之異於唐。欲戰不得戰也。請次言和。宋北狩之後。偏安江左。是時高宗勵精圖治。諸大將屢奏

戰功。南人氣勝。金人膽落。是以王倫輩得成和議耳。基業甫就。我兵積弛。從未斬將搃旗。讐服四遠。顧專恃尺一之詔。一介之使。俾彼強鄰就我戎索。此和局之異於宋。欲和不得和也。然而天下大計可知已。昔曹操百萬敗於赤壁。苻堅投鞭斷流。敗於淝水。勢非不强。兵非不衆。然而長江大河。波濤洶湧。雖衆且强。無所用之。是故於守爲易。因上防河事宜。且曰。當此危急之秋。晏然自謂無事。議和不成。必將大舉。及今綢繆猶患其晚。乃徒狃偏安。苟且旦夕。卽不能光復。

大業獨不念祖宗締造之艱乎。疏上亦不報。我師下江南可聘。棄官歸以老壽終於家。嘗自言始讀王文成公全書奉教於劉念臺先生。知有知行合一之學。已又與陳幾亭游。知有居敬窮理之學。晚節讀宋諸儒語錄。知有四通八達理一分殊之學。其後益潛心朱子。始知有存養性情主一無適之學。所著有自警篇及訓子諸書。文藏於家。先是溫體仁故忌可聘。然數語人曰。喬使君清正君子。未可沒也。黃耳鼎既被劫。卽造可聘門謝罪。終其身不敢怨。可聘之正已格。

物多類此

外史氏曰。東林尚學聖賢。然流於氣節者多矣。余謂氣節者豪傑之大端。非聖賢之全體也。豪傑者狂簡之謂歟。先生言遜行簡。以約自處。不驕不卑。其狷者也歟。

公與... 志... 不... 其...
 公與... 志... 不... 其...
 公與... 志... 不... 其...
 公與... 志... 不... 其...
 公與... 志... 不... 其...
 公與... 志... 不... 其...
 公與... 志... 不... 其...
 公與... 志... 不... 其...
 公與... 志... 不... 其...
 公與... 志... 不... 其...

華允謀傳

弟允誼

華允謀字汝翼無錫人弱冠舉萬曆庚子孝廉壯遊
 東林非濂洛關閩之書不讀非孝弟忠信之言不言
 窮治六經而驗之身心惟恐不合尤潛心易理凡卦
 爻靡不體認於身心及任寶應縣教諭日與二三同
 志研求性命之學心誠口苦聞者悚然諸生中有爭
 地終歲不解者服其教各讓不取乃即其地築堂三
 楹顏曰興讓率諸生有志行者講習其中立規約東
 尤以正人心辨是非為急日是非明而好惡公好惡

公而賞罰當賞罰當而勸懲備從善去惡返正易邪之念決矣嘗謂弟允誼曰今之學者稍著科第官爵一念便落利字將究竟無所不至蓋此念卽患得患失之根此根不除而一生功力左旋右轉總成無父無君種子其言痛切如此允誼深佩其兄之教遂成名儒又云人知身不妄動易心不妄動難而不知心不妄動易身不妄動難也人知靜坐之以心簡身而不知靜坐之以身涵心也皆獨得之語爲先儒所未發高攀龍稱其爲人純然若赤子退然若處子至辨

義而趨毅然若勇夫猛士千萬人而不憚人所滔滔而驚之者必深愧之人所昧昧而違之者必深嗜之人嘲之以爲迂以爲腐而不知其所圖維皆千秋之事也年至中歲遂卒著有三像粹精春秋傳戴記纂疏諸書藏於家

外史氏曰先生之學純如矣皎如矣足可以爲師表矣惜乎中歲而歿使天假以年又不知其何如之造詣也

蕭山

吳世

史史及田武生之

蕭蕭蕭蕭

華也半至中

人

而

善而

東林列傳卷末上

江陰陳鼎定九輯門人

沈霽載陽

全校

蔡世英偉人

附熹宗原本本紀上

熹宗達天闢道敦孝篤友章文襄武靖穆莊勤慈皇

帝諱由校光宗第一子也生於萬曆三十三年十一

月甲申日母選侍王氏是為孝和皇太后神宗以元

孫生詔告天下萬曆四十八年九月乙亥朔光宗崩
遺詔皇長子嗣位諸臣入臨請見皇長子時選侍李
氏踞乾清宮要封皇貴妃不令出良久方御寢門諸
大臣擁至文華殿叩慰畢請卽位不許諭禮部具儀
注大學士劉一燝奏今乾清未淨殿下宜暫居慈慶
吏部尚書周嘉謨奏殿下今日之身社稷神人所託
卽詣乾清哭臨必俟臣等至始發皇長子首肯兵科
給事中楊漣語司禮中官王安外事緩急在諸大臣
調護聖躬是內臣事因勉以忠義安力任之諭大臣

率欽天監相視山陵首輔方從哲票擬賞李可灼白
金五十兩紵絲三表裏是日皇長子居慈慶宮丙子
頒大行遺詔丁丑大臣請選侍移宮戊寅御史王安
舜以首輔方從哲擬賞可灼非是特糾可灼擅進紅
丸之罪改旨奪俸一年御史左光斗請肅清宮禁御
史鄭宗周請誅崔文昇令旨下司禮監查勘己卯選
侍未有移宮期從哲欲緩之楊漣力爭卽日移仁壽
殿中官王永福等八人皆鄭貴妃李選侍所私也盜
乾清珠寶下詔獄訊之獄具永福及劉進忠鄭穩山

東林列傳 卷之十一
劉尙禮姜昇劉遜棄市盧相趙進忠戍邊庚辰皇長子卽皇帝位大赦天下改明年爲天啟元年以是年八月至十二月屬之泰昌辛巳諭德張鼎上養身養性勤學敬天法祖親賢納諫信令恤民持體十事報聞壬午給事中惠世揚劾方從哲十大罪從哲自辯求去不允諭尊光宗元妃郭氏才人王氏爲皇后議謚癸未御史袁化中再糾方從哲誤國甲申上皇祖大行皇帝謚恩賚扈從慈慶宮文武諸臣丁亥上皇祖妣孝端皇后尊謚孝端上皇祖妣皇貴妃尊謚孝祖妣孝端皇后尊謚孝端上皇祖妣皇貴妃尊謚孝

靖頒詔天下允禮臣請開經筵擇講官允給互市沙什台吉冠帶巳丑上大行皇帝尊謚庚寅命寶源局仍鑄泰昌通寶錢命設督運糧餉官給關防命中官李實織造浙江逮遼東總兵李如柏李如楨如柏自縊辛卯給事中楊漣劾兵部尙書黃嘉善一籌莫展宜加誅斥癸巳蘭州黃河清江西大水甲午廢中官魏進忠兄釗錦衣千戶封乳母客氏爲奉聖夫人官其子侯國興爲錦衣衛正千戶丁酉發帑金五十萬修慶陵戊戌收淨身男子三千人御史賈繼春疏請

東林列傳 卷之二 三
安選侍遼東總兵賀世賢與我兵戰於灰山己亥赤
氣映天如赭良久乃散御史左光斗因賈繼春言疏
陳移宮之由請安選侍庚子諭戶部東事未平加派
不能遽免其災傷地方加意撫恤辛丑諭內閣曰朕
昔幼冲皇考選侍李氏恃寵驕恣氣毆聖母以致懷
憤感疾崩逝朕寃憤莫伸惟抱終天之痛皇考大漸
閣部諸臣入內問安選侍威挾朕躬傳封皇后用手
推朕向大臣覲顏口傳至今含報因避其毒暫居慈
慶李氏使李進忠劉遜等傳每日章奏先奏聞李氏

方與朕覽仍思卽日垂簾聽政處分御史左光斗他
日必爲武氏之語朕思祖宗家法甚嚴從未有此規
制朕今奉養於噦鸞宮仰遵皇考遺愛凡爾外廷誤
聽李黨浮議未悉朕心之厚也李進忠田詔等盜庫
情真致干憲典豈謂株連卿等可傳示部院遵行故
諭御史馮三元等劾經略熊廷弼專工作而尙威刑
命解任聽勘壬寅黃嘉善罷冬十月甲辰朔命寧晉
伯劉天錫攝享太廟丙午葬神宗孝端皇后於定陵
孝靖皇后遷祔賑江北水災官客氏弟客光先爲錦

東林列傳 卷之十一
四
衣衛正千戶丁未擢袁應泰爲兵部右侍郎兼右僉
都御史經略遼東壬子遵遺詔加恩東宮講官丙辰
祧英宗神主丁巳賞九邊軍士已未神宗及孝端皇
后主升祔於太廟允禮臣請選大婚庚申以孫如游
爲禮部尙書兼東閣大學士入閣辦事辛酉御經筵
甲子御史賈繼春安伸田珍以如游由中旨入閣非
故事請收回成命不聽減雲南貢金額二千兩以後
勿征以崔景榮爲兵部尙書丁卯熾鸞宮災戊辰命
大臣公舉風力科臣勘遼東功罪癸酉發帑金一百

八十萬兩犒邊十一月甲戌朔頒天啟元年大統曆
丙子上聖母孝元皇后孝和皇后尊謚命編修劉鴻
訓給事中張國祥使朝鮮丁丑撤回天津採取銀魚
內官專敕內監選后及妃嬪甲申允給事中張其庭
奏免畿輔加派一年命給事中朱童蒙往遼東勘延
弼功罪乙酉諭大臣不得輕於求去言官不得任意
雌黃務協恭盡職以全國體命撫按嚴覈驛遞戊子
發京營選鋒三千戍石塘堡辛丑命泰寧侯陳良弼
攝祀上帝於圓丘癸卯賜袁應泰尙方劍給事中周

東林列傳 卷之十一
五
朝瑞特糾賈繼春十二月甲辰朔命輔臣撰救獎楊
漣奏寢之戊申御史方震孺疏述三朝艱危帝是之
乙卯詔曰朕冲齡御極內外清平不意外廷邇來忽
生謗讟輕聽盜犯之訛傳釀成他日之實事不得不
申諭避宮始末以釋羣疑九月初一日皇考賓天入
臨諸臣卽請見朕李選侍阻朕於煖閣以司禮官固
請始出旋使李進忠促回至於再三方朕蒞乾清宮
進忠牽衣不放繼又遣人要之宮門不欲使御文華
殿此卿等親見當時景象安乎危乎果當避宮乎不

當避宮乎爾刑部及各衙門欲行庇護之私妄借安
選侍爲題目是非淆亂豈曰忠謀輔臣義在體國爲
朕分憂何不代傳諭言屏息紛擾君臣大義何在如
初一日視皇考入殮選侍又阻朕於煖閣司禮監官
以大臣言再四陳請方許初二日朕送皇考梓宮於
仁智殿行禮未畢邀朕再行朝見方許回慈慶宮扈
從大臣科道官所親見明是威挾朕躬垂簾聽政之
意朕蒙皇考派之照管原非任彼宮飲膳衣服皆皇
祖皇考所賜與選侍無與獨其侮慢凌虐有闔宮所

東林列傳 卷之二
共見而不忍言者。皇考既知其故，親臨慰勸，并使宮
官喻解，而選侍以毆崩聖母，自知有罪，使人時來探
朕，不許與聖母宮人一言。有卽致罪，此朕年來苦衷。
外廷不能盡知，前刑部執奏父母之恩，猶天地仁人
孝子，用心固然。朕以故停其封號，以慰聖母在天之
靈。奉養優厚，敬遵皇考遺愛。該部亦可仰體朕心矣。
乃大小臣工，惟知私於李黨，責備朕躬，不顧大義。卿
等其知之。南京軍士鼓噪燒科臣晏文輝公署，方從
哲罷庚申，以少詹事徐光啟兼監察御史練兵，以周

應賓爲南京禮部尙書，丙寅錄宋儒張載十四世孫
文運爲奉祀，給冠帶。己巳，命各處府州縣皆立武學。
天啟元年春正月癸酉朔，大風雪，命擇日開講。甲戌，
穆廟奇妃葉氏薨，宴朝鮮陪臣。允禮臣請有犯廟諱
御名者悉改之。己卯，發帑金五十萬兩充遼餉。庚辰，
親享太廟。辛巳，諭閣臣孫如游出視事，都給事楊漣
乞歸。允之。甲申，御文華殿講讀。乙酉，詔選淨身男子
一千五百人入宮。丙戌，土星逆犯井宿，命鑄提督陵
工內監關防。丁亥，准柳祚昌襲安遠侯。戊子，命大學

士韓爌相度定陵庚寅補大選贈劉元震禮部尚書
廕一子入監趙煥太子太保廕一子中書舍人給巡
方印信我兵攻撫順破二十餘屯以原任總兵薛永
壽管甘州西路事壬辰逮寧夏總兵王如金補給名
臣伍文定等七十三人從禮部左侍郎周道登請
也甲午御史方震孺言人心不平者三一日國本之
爭二日門戶之說三日移宮之事請召對不允乙未
賜瑞王桂王惠王莊田丁酉帝始冠戊戌增收淨身
男子二百人刑科給事中暴謙貞劾李徵儀官應震

劉文炳趙興邦章下所司辛丑定知經筵及講讀侍
班官發帑金五十萬充慶陵工費壬寅御史王心一
劾客氏魏進忠不報二月癸卯朔戊戌陳槐以冒認國
戚故也我兵攻香爐山禦之甲辰言官請復當朝口
奏及召對之典從之乙巳日暈見於遼陽旁有珥如
月赤白色又如環四面各有形如日又化爲青虹如
弓與日相背自辰至午始滅丁未遣大學士劉一燝
祀先師孔子發盜甲器械於遼陽詔選淑女罷漕運
總兵官修國子監廟舍考稽生儒戊申親祭社稷壬

東林列傳 卷之十一
子陝西固原軍餘李文等以妖言聚眾伏誅癸丑我
兵薄奉集堡乙卯狂人張道安冒衛士服入朝班癩
言命衛司雜治因飭朝儀戊午我兵攻虎皮驛尋至
王大人屯己未初開經筵加贈大學士于慎行少保
予廕壬戌頒泰昌錢式甲子安仁草場火庚午楊鎬
李如楨論死陝西臨洮地震辛未嚴禁左道閏二月
癸酉朔免肅藩貢馬南京吏部尚書沈應文罷丙子
大風霾丁丑荆王由樊捐祿二千兩餉遼戊寅命大
學士劉一燝詣慶陵相視懸宮己卯久旱禱雨復遼

東科舉乙酉風霾如前戒諭羣臣辛卯高弘圖張慎
言爲賈繼春訴冤嚴旨奪俸詔天津興屯務癸巳火
星逆入氏宿甲午御經筵風霾諭羣臣修省是日日
生交暈左右珥黃白相接白虹亘天起孫瑋爲南京
吏部尚書魏養蒙爲南京戶部左侍郎兼右僉都御
史總督糧儲丙申除建文忠臣齊泰親屬戍籍得歸
者三十三家并黃子澄親戚戍者亦如之戊戌昭和
殿災加朶顏衛頭目克帖木阿卜來俱指揮僉事海
州吳金祖叛總兵李光榮擒之辛丑斥賈繼春爲民

東林列傳 卷之十一
給事中蕭基極論姚宗文閱視之誤陞副總兵賀世賢爲征彝總兵三月辛亥大風揚塵四塞乙卯我兵入渾河至頭目屯甲寅圍瀋陽乙卯下瀋陽總兵尤世功賀世賢及援遼川浙總兵陳策童仲揆管糧同知陳輔堯自在州知州段展諸將吳文傑雷安民戚金袁見龍鄧起龍張名世周敦吉石柱土官秦邦屏等皆死之辛酉恤三路陣亡將士劉挺王宣杜松各贈少保予謚廕潘宗顏光祿卿董汝礪張文炳各僉事餘贈廕有差壬戌我兵下遼陽巡按御史張銓兵

備副使何廷魁崔儒秀同知冒日乾都指揮徐國能等死之袁應泰自焚死西鹵炒化陷長安堡癸亥補給四川天全六番招討使楊愈詔命丙寅詔廷臣舉謀略出衆者丁卯命修神宗實錄海州四衛皆破起舊經略熊廷弼爲兵部右侍郎陞楊愈爲五軍營總兵官協理京營事務庚午發帑金一百萬兩餉遼夏四月壬申朔日有食之癸酉浚都城濠安南入貢初禁抄發軍機疏檄命薊遼總督文球攝經略事日中有黑氣摩盪將暮赤星見東方以李宗延爲右僉都

御史協理戎政遼東巡撫薛國用薦用白養粹乙亥
以薛國用爲兵部右侍郎兼右僉都御史經略遼東
是日午刻寧夏洪廣堡風霾大作墜灰如瓜子踰時
而止日將入作紅黃色外若炊烟日光所射如火延
綏孤山城陷三十丈入地二丈五尺丙子命天津督
餉侍郎李長庚回部管事以王化貞爲右僉都御史
巡撫廣寧丁丑防海戊寅兵部尚書崔景榮請演火
器於都門外併分道募兵四川妖僧政神作亂擒之
辛巳山西懷延二衛地震癸未誅降賊廢紳黃衣南

京工部尚書丁賓致仕甲申詔舉邊才添設職方郎
中主事各一員命鑄經略遼東巡撫天津巡撫通州
三處關防乙酉發盔甲弓矢器械火藥等項給廣寧
以援遼逗遛逮保定總兵郭增輝丙戌發帑金十萬
兩築山海邊牆戊子山西開平龍門二衛地震己丑
倭犯澎湖禦却之癸巳逮遼東陣逃贊畫劉國縉監
軍道牛維曜海蓋道康若乾等甲午緝獲通夸提塘
官劉保下詔獄命鑄援遼兵將關防給總兵王威乙
未命御史傅宗臯總兵楊于茂招練新兵丁酉起兵

東林外傳 卷之二
部尚書王象乾涂宗濬俱以太子太保兵部尚書源
官起用象乾總督九邊宗濬提督京陵軍務戊戌冊
張氏爲皇后己亥卹遼陽死事諸臣張銓大理卿尤
世功陳策少保各賜謚廕崔儒秀何廷魁光祿寺卿
賜謚廕童仲揆都督同知吳文傑周敦吉戚金鄧起
龍秦邦屏都督僉事等官未幾銓再贈兵部尚書儒
秀廷魁同贈大理寺卿庚子鑄選將募兵關防傑劉
保於市並誅其子五月壬寅朔冊王氏良妃段氏純
妃御史張捷請罷內操不報甲辰風霾四塞乙巳御

史王允成請卹錄廢籍顧憲成等章下所司丙午敘
延鎮監市勞賞卜失兔阿不害等有差丁未黔苗平
宣捷集廷臣議兵餉緩急戊申兵部尚書崔景榮罷
以王象乾代之辛酉固原寧夏援遼兵潰逮逃官河
南布政司馮盛明河北道副使吳瑞徵乙丑宥永戌
石星子石應奇回籍戊辰杭州火災蠲本年春運織
造諭祭遼陽陣亡將吏己巳安置中官盧受於鳳陽
命天下朝覲官賚送所造兵器六月辛未朔熊廷弼
建議恢復遼左須三方布置從之分遣御史募兵癸

酉李光榮革職聽勘乙亥戶部尚書李汝華致仕以大婚禮成加恩客氏丙子擢熊廷弼為兵部尚書兼右副都御史駐札山海經略遼東總督薊遼侍郎文球致仕廕張銓子道濬為錦衣衛指揮僉事世襲己卯敕修神宗光宗實錄辛巳王象乾請行邊不允甲申敘貴州征苗功加張鶴鳴兵部尚書廕一子世襲錦衣衛千戶輔臣葉向高等各進秩有差命成山伯王國柱為南京左府都督東寧伯焦夢熊為後府都督誠意伯劉蓋臣為右府都督撫寧侯朱國弼以僉改汪應蛟為戶部尚書何應祥為南京工部尚書庚寅火落赤遣使挾賞邊吏以聞加宗室及聖裔解額諭留客氏於大內癸巳命定西侯蔣承勛為南京前府都督秋七月庚子朔給援遼死事石柱宣撫司秦拱明地三十頃辛丑上神宗昭妃徽號曰宣懿壬寅增設遼東各路監軍癸卯擢客氏男侯國興為錦衣僉事丁未增置軍器局戊申卹陣亡軍士庚戌加四川酉陽土司冉躍龍為宣慰司及妻誥命以勤王狗

難故也京師旱蝗辛亥賜熊廷弼尚方劍麒麟服命百僚餞之都城外壬子以軍興用詘免織造三分之一甲寅王象乾總督薊遼軍務丁巳以陳薦爲南京刑部尚書魏養蒙爲南京戶部尚書祁裕伯爲南京右都御史乙丑補敘萬曆四十二年延綏寧夏固原捕獲功宣捷午門祭告郊廟八月庚午朔祠土木狗難右都御史鄧榮於其鄉且治其塚丙子王化貞奏皮島毛文龍鎮江之捷擢爲副總兵辛巳御經筵壬午遣郎中梁之垣宣諭朝鮮乙酉土魯番入貢授死

事土司秦邦屏子官貴州大水命給容氏墳地以田爾耕爲錦衣衛都督同知戊子杭州復火詔停織造已丑光宗山陵畢祔廟議祧憲宗癸巳以初元停各處決囚甲午撤金水河北臺改朝鮮貢道追復李材原官熊廷弼奏三方布置有名無實九月壬寅葬光宗慶陵戊申祔廟贈援遼都司張神武爲都督同知甲寅中官王昇攔擊戎政都御史李宗延於朝門不問乙卯四川土司奢崇明叛殺巡撫徐可求等據重慶分兵攻合江納溪破瀘州遂攻成都僞號大梁丙

辰以陵工敘中官王體乾魏進忠功劉一燦不可進
忠怒疏辭允之己未薊州遵化密雲地震乙丑徐宗
濬卒命黃克纘兼攝戎政客氏既出宮復入且諭諸
臣不得煩激丙寅奢崇明陷遵義丁卯陷興文知縣
張振德死之魏進忠殺司禮太監王安冬十月戊辰
朔御史馬鳴起糾客氏奪俸給事中侯震暘復糾之
不報己巳給事中倪思輝朱欽相御史王心一並糾
客氏嚴旨調外任召張鶴鳴爲兵部尙書擢饒景暄
爲兵部左侍郎協理戎政以王三善爲僉都御史巡

撫貴州兼督湖南川東軍務辛未以河冰堅固馬上
差人催督各鎮人馬器械車輛星夜出關故永康侯
徐應坤卒子錫胤嗣丙子百戶陳有繼請開礦付詔
獄濬京城濠成癸未慶陵興工乙酉奢酋圍成都丙
戌陝西會寧產異獸遍體鱗甲有火光按臣聶紹芳
以聞丁亥命遊擊金冠出海援遼初經略熊廷弼議
三方布置主守巡撫王化貞主戰時以鎮江之捷朝
議皆右化貞請裁經略及鎮江再陷又責廷弼出關
廷弼上四事乞樞臣張鶴鳴預決一事不中制一同

心呼吸一母懸度逞臆一母扶同誇詡己丑以朱爨
元爲右副都御史巡撫四川許便宜行事改楊愈懋
四川總兵薛來亂湖廣總兵辛卯追敘延鎮寧夏甘
肅功黃嘉善楊應聘和裕伯等各進官賜廕有差辛
卯發帑金二百萬助邊甲午禮部主事劉宗周劾魏
進忠奪俸江都妖民武悟空伏誅十一月戊戌朔逮
遼東舊撫李維翰乙巳陞田爾擘爲錦衣衛右都督
套鹵卜失兔等補萬曆四十七年貢馬丙午冬至躬
祀上帝於園丘丁未宴安南陪臣於禮部甲子石砮

司女將秦良玉率兵討賊丙寅陞顧秉謙禮部尙書
兼翰林學士仍掌詹事府事起翁正春爲禮部尙書
丁卯吏部尙書周嘉謨封印乞歸許之命盛以弘誓
署部事十二月戊辰朔我兵屯海州庚午續敘遼瀋
死事諸臣張神武等贈廕有差下東華門管事內官
趙昇王受等於獄癸酉給戚繼光俞大猷謚廕丁丑
以張我續爲兵部右侍郎總督四川貴州兼制雲南
湖廣賜尙方劍便宜行事庚辰衛一鳳罷辛巳改張
問達爲吏部尙書是日午刻日上有一物覆壓摩盪

怪風揚沙天皆赤鑄冊庫關防總理戶部十三司歲額錢糧癸未安南補貢丙戌敘定陵功陞田爾畊爲左都督庚寅命焦夢熊協同守備南京命許世臣鎮守薊永山海蕭如熏鎮守寧夏白兆慶鎮守延綏魯欽慎鎮守保定紀元憲鎮守廣西崔天賜鎮守廣東劉國鏞鎮守陝西辛卯以鄒元標爲左都御史壬辰給石柱女將秦良玉夫人誥命丙申裕享太廟

二年春正月己亥慶陵工成廢王體乾魏進忠弟姪一人錦衣僉事敕廷臣會議經撫去留初王化貞稱

經臣阻其東出願以精兵六萬專制橫行廷弼謂果能六萬了事願禡職以待科臣侯震陽痛論遼事經撫兩存其禍立見坐與輔臣忤鐫職調外已而化貞大敗已酉山西平陽及各州縣地皆震辛亥詔卽今歲卓異中舉邊材丁巳我兵下西平堡副總兵羅一貫參將黑雲鶴死之總兵劉渠祁秉忠等逆戰於沙嶺兵潰及副總兵劉徵俱歿參將孫得功以廣寧降王化貞棄軍走熊廷弼收軍民入關監軍高出胡嘉棟韓初命俱逃參政高邦佐獨留松山死之壬戌改

黃克纘爲兵部尙書協理京營戎政癸亥張鶴鳴請視師賜蟒玉尙方劍隨行者並進秩命王在晉署兵部事乙丑京師戒嚴停殿工申保甲法是月成都圍解魏養蒙爲南京兵部尙書套部入延綏邊掠黃花等峪撫臣張之厚匿不以聞二月戊辰逮廣寧倡逃監軍高出胡嘉棟韓初命已巳諭科道官有結黨賣奏者置重典辛未命大學士何宗彥朱國祚爲會試主考癸酉山東濟南東昌州縣河南汝寧同日地震水西土同知安邦彥反破畢節安順平壩霑益龍里

等處進圍貴陽卹河西殉難諸臣甲戌月犯天關乙亥月掩井宿丁丑製戰車賑河西逃難士民以孫承宗爲兵部尙書兼東閣大學士入閣辦事以楊麒守延綏吳守德守寧夏李懷信守大同皆充掛印總兵官戊寅蠲天下帶徵錢糧並免直隸加派己卯改王紀爲刑部尙書逮王化貞琥熊廷弼職回籍聽勘丙戌太白晝見戊子命解經邦爲兵部侍郎經略遼東己丑命孫承宗掌兵部事大風霾逮韓初命壬辰遣官河南買馬刑部主事王之來追理張差舊案糾劉

廷元胡士相岳駿聲劉光復詔不問乙未改陳薦爲
南京戶部尚書王永光爲戶部尚書總督倉場三月
丁酉朔大學士劉一燝致仕己亥舉內揀辛丑鑄天
啟通寶錢命勛臣募兵壬寅鑄遼東監軍分理關內
關外關防給監軍閻鳴泰袁崇煥甲辰嚴都城九門
詰奸法解經邦辭經略不赴黜之鑄管理募兵關防
給陽武侯薛濂擢王在晉爲兵部尚書經略遼東陞
李長庚爲南京戶部尚書丙午歷城長清濟陰臨邑
樂陵東阿荏平肥城地震三日壞民居無數丁未與

高邦佐羅一貫謚廕賜太祖臨安公主孫李昌嗣國
子生庚戌禁勛臣募兵辛亥策天下貢士賜文震孟
等四百人進士及第出身有差戊午大索奸細於京
師己未工部尚書王佐罷庚申荆王由樊薨辛酉禱
雨壬戌河南地震乙丑給毛文龍水軍三千夏四月
丙寅朔會鞠王化貞熊廷弼庚午因邊事敕諭羣臣
甲戌追敘臨洮斬獲功賞賚有差以姚思仁爲工部
尚書丙子朱熒元復重慶辛巳禮部尚書孫慎行追
論方從哲李可灼進紅丸之罪下廷臣會議鄒元標

東林列傳 卷之十一
請添註三品京堂以疏淹滯從之癸未罷寶和皇店
稅乙酉廢死節同知陳輔堯段展子爲國子生丙戌
下逃弁梁邦弼於法司丁亥以孫慎行爲經筵講官
戊子四川巡按張論進飛石架木法以備城守巳丑
屯田天津壬辰京師大雨雹鄒元標追論方從哲之
罪癸巳命朱純臣掌南京前軍都督府印務詔給死
難興文知縣張振德與妻錢氏祠謚廕祭贈王德完
戶部尙書五月丙申朔都城旗纛廟災火藥盡焚傷
民居無數戊戌復前大學士張居正官謚賜祭建祠

四川梓潼縣妖賊白仙臺等伏誅己亥恤先臣方孝
孺遺嗣壬寅戌逃臣冒日乾甲辰王紀疏糾沈淮不
聽釋瀋府幽禁老疾罪宗定逃臣胡嘉棟高出罪李
維翰鄭之范論斬之范仍復追贓丙午山東白蓮妖
賊徐鴻儒反陷鄆城丁未雲南巡撫沈儆炆奏水西
叛逆戊申山西平陽等州縣同日地震庚戌葉向高
王紀請寬張拱宸等以安中宮不聽山東妖賊攻鉅
野知縣趙延慶却之加石砭女將秦良玉都督僉事
戌逃臣韓初命總兵楊茂春郭增輝壬子賞效力守

禦哈喇等米布有差丁巳六科給事中趙時用等冷
疏糾沈淮當罷不聽戊午山西太原地震己未妖賊
攻滋陽知縣楊炳却之命五經博士孔胤植襲封衍
聖公庚申括直省存庫銀充餉給事中薛大用糾川
督張我續誤國之罪不聽山東兗州府已時見天上
月明當午一星隨月西轉壬戌給事中張鵬雲追論
劉廷元曲庇張差罪命調廷元外任癸亥妖賊攻兗
州守將楊國棟敗之四川官兵復重慶六月丁卯給
事中周朝瑞疏劾張鶴鳴與王化貞同罪不報予方

孝孺祭葬並謚鑄援遼總兵關防給毛文龍戊辰妖
賊破鄒縣又破滕縣知縣姬胤文死之事聞贈太僕
少卿加毛文龍爲平遼總兵庚午命恭順侯吳汝胤
總督京營戎政妖賊陷夏鎮御史溫臯謨再劾鄭養
性己卯發帑金五十萬築遼東邊牆辛巳奢酋僞總
兵張武等就擒僞丞相何若海等降卹國本建言諸
臣復職贈廕馮應京等九人復職贈官顧憲成等六
十四人加成山伯玉國柱太子太保給事中汪慶百
彭汝楠沈惟炳方有度並追論進藥移宮事請定方

東林列傳 卷之二 三
從哲李可灼崔文昇之罪丙戌御史徐景濂爲方從
哲奏辯宣付史館方有度爭之詔廷臣會議於是尙
書張問達汪應蛟王紀等公疏言從哲實庇可灼文
昇給事中沈應時魏大中沈惟炳等引春秋弑逆大
義責方從哲侍郎張經世陳邦瞻卿寺蕭近高攀龍
給事中劉弘化御史劉芳侯恂等各疏從哲罪不聽
戊子山東官兵討妖賊戰兗州城外敗績庚寅黃克
纘復爲從哲奏辯王紀及給事中薛文周沈惟炳魏
大中連疏劾之不聽壬辰鄆城鉅野賊平癸巳東鹿

肥鄉大水朱熒元復瀘州秋七月辛丑冊慧妃范氏
甲辰刑部尙書王紀削籍大學士葉向高諫不聽以
孫瑋爲刑部尙書高攀龍復理方從哲崔文昇鄭養
性罪切責奪俸淫雨壞山海邊墻丁未巡撫山東趙
彥請留班軍討賊戊申官軍破賊於韓莊再破之於
夏鎮運道始通妖賊攻曲阜知縣孔聞禮却之己酉
發帑金三十萬撫邊辛亥禮部尙書孫慎行致仕壬
子沈淮以劾免仍晉少保命賑山海二路雨災詔撫
集遼民給以田廬庚申貴州官兵敗績遵義復陷癸

亥畿南紅巾賊于志弘反黃克纘以劾免八月甲子朔以孫瑋爲刑部尚書太僕少卿滿朝薦以追論袁應泰王化貞斥爲民丙子大學士孫承宗自請督師經略遼東進太子太保丁丑武夸妖賊平壬午以顧秉謙爲禮部尚書王在晉爲南京兵部尚書閻鳴泰爲僉都御史巡撫遼東甲申禁百官私交乙酉卹四川死事諸臣九月甲午朔光宗及孝和皇后主入廟以董漢儒爲兵部尚書改陳薦爲南京吏部尚書丁酉給事中朱童蒙劾鄒元標馮從吾鍾羽正京城講

學三臣抗章自白且求罷不允庚子詔於所在土地計畝增新兵餉以李長庚爲南京戶部尚書黃汝良爲南京禮部尚書乙卯臨洮地震冊封皇五弟由檢爲信王停今年決囚丙辰給事中甄淑請文武一體殿試以尊主權辛酉演象所災壬戌臨洮地復震趙彥政勝縣賊黨縛徐鴻儒餘出降冬十月癸亥朔川督張我續獻俘贈死難副使孫好古大理卿廕一子世襲錦衣衛千戶四川巡按張論奏遵義復陷甲子命魯欽以原官總川湖貴州漢土官兵進勦乙丑以

李養正爲南京刑部尙書壬申雲南官兵恢復霑平
命備紅彝贈袁應泰兵部尙書給與祭廕贈殉難土
司彭象都督僉事山東巡撫趙彥奏捷獻俘己丑左
都御史鄒元標致仕修撰文震孟上國勢綦艱疏奉
旨調外南京兵部尙書魏養蒙卒陳道亨代之是月
有龍見於北花房河中長尺許詔放黑龍潭十一月
癸巳朔加貴州巡撫李標爲兵部侍郎右僉都御史
巡按史永安太僕寺少卿仍舊任戊戌慶陵工成俘
何若海等至京磔於市贈徐可求右都御史予世廕

庚子俘徐鴻儒等至京磔於市十一月辛丑擢趙南
星爲左都御史房壯麗爲工部右侍郎兼右僉都御
史總理河道甲辰冊封光宗選侍劉氏爲貞靖賢妃
信王生母也皇弟由模追封簡懷王皇妹追封悼懿
公主戊午發帑金五萬兩賑遼民戊午李可灼於邊辛
酉以楊述中爲兵部侍郎總督貴州進朱爕元爲兵
部侍郎總督四川湖廣左副都御史馮從吾罷發帑
金三十萬兩充黔餉十二月甲子冊封光宗選侍李
氏爲莊妃暹羅入貢丙寅宗室慎鋈首登進士科命

授京職著爲令己巳貴陽圍解以山東平命存卹孟氏子孫修復孟廟癸未以何熊爲南京吏部尙書朱光祚爲副都御史協理戎政敘平妖功加趙彥兵部尙書餘陞賞有差辛巳停各衙門添註官覈四川文武功罪廢卹勘議有差卹廣東死事將士丙戌南給事中歐陽調律請舉建文廟祀并修實錄下禮部議辛卯旌表孝義節烈

三年春正月壬辰朔甲午五更火星犯房宿北第一星庚子玉牒成葉向高等各進秩有差織造中官李

實許有司不行屬禮工部尙書姚思仁劾之不問再恤建言散秩諸臣御史溫臯謨劾黃嘉善崔景榮張鶴鳴章下所司乙巳山東妖賊平巳酉命朱國楨顧秉謙朱延禧魏廣微俱以禮部尙書兼東閣大學士入閣辦事紅彝入彭湖壬子鳳凰集開封大驄山撫臣以聞癸丑月犯鍵閉星戊午斥鄭養性居遠方巳未大學士孫承宗爲中部大將馬世龍請尙方劍允之二月癸亥考察京官丙寅山東蓬萊地震陳必謙再糾鄭養性劉廷元戊辰追卹征妖將士張榜等五

東林列傳 卷之十一 三
十七人命顧秉謙朱延禧同知經筵日講并實錄總裁已巳以盛以弘爲禮部尙書兼翰林院學士改李長春爲戶部尙書陞張輔之爲南京工部尙書辛未鄭養性請居杭州乙亥貴州副總兵劉超大敗安賊於陸廣河叅將秦明屏復敗之於乾溝破其五寨丁丑賜平遼總兵毛文龍尙方劍戊寅命太監劉朝胡良輔紀用陶文班賞關門暹邏入貢辛巳永平城樓災火藥盡焚壬午以鍾羽正爲工部尙書乙酉贈死難孟子嗣孫博士孟承光爲太僕寺少卿母孔氏加

號貞淑子弘略爲太常寺丞僕習天壽爲百戶己丑御史周宗建劾魏進忠郭鞏責令回話貴州官軍敗績於陸廣起李三才爲南京戶部尙書三月乙未月犯畢宿第一星丙申南丹州土官莫儁陰黨安酋其祖母韋氏殺之詔旌其義丁酉紫荆妖民趙思武聚衆爲亂推官花紹序擒之以陳大道爲戶部尙書李宗延總督倉場壬辰松江地震左都御史趙南星申明憲職詔所司永遵乙巳薊鎮天鼓鳴有星隕大如車輪火光四燭丙午登萊地震辛亥命鑄平遼叅謀

錦衣衛僉事關防給毛雲龍禁抄機密重情雲南逆賊祿千鍾犯尋高武定曲靖官軍禦却之甲寅禱雨銀定入犯擊敗之黃梅熊宣等作亂擒之詔釋江南罪宗決奸細杜茂丁巳登萊水兵出海琉球入貢夏四月庚申朔京師地震辛酉命肅朝儀壬戌盜入神武門獲之釋江西罪宗丙寅諭各督府選將材戊辰遣官祭孟廟己巳朱國祚致仕庚午旌韓莊王妃董氏慈節韓王亶睿賢孝改建羅一貫祠於甘肅賜額精忠辛未兩廣總督胡應台進西洋練習火器者

命教肄京營戊寅蠲薊州草場租庚辰停三部總理戊子貴州巡撫王三善奏大水塘之捷朝鮮國王李瑄爲其姪倅所篡巡撫登萊袁可立請討之督餉侍郎畢自嚴言討之非計當俟請貢輸誠東征効力徐許其封耳報可己未大理少卿范濟世請加封李選侍詔切責之逮失機總兵杜文煥五月庚寅朔禮部尙書盛以弘致仕壬辰順義王卜失兔遣使入貢己卯御史宋師襄追論劉朝之罪命捕餘黨下有司庚子詔選淨身男子一千人河決睢陽以林堯俞爲禮

部尚書天暑慮囚四川永寧大捷奢崇明父子敗走紅崖丁未冊封才人張氏爲裕妃贈山東死難滕縣知縣姬文胤爲太僕寺少卿六月庚辰朔詔再選淨身男子一千人御史劉之鳳請罷內操不許秋七月辛卯南京大內火奢寅父子敗走龍場賜遼東死事諸臣祠額己亥史繼偕致仕甲辰光宗實錄成丁未鍾羽正致仕以王舜鼎爲工部尚書辛亥命劉孔昭襲封誠意伯甲寅廢王體乾魏進忠弟姪爲錦衣指揮世襲廷臣爭之不報乙卯何熊祥罷董漢儒丁憂

歸以趙彥爲兵部尚書八月己未朔內使王文進毆殺戴忠下司禮監刑部尚書孫瑋請下法司不聽莊士元棄市以王舜鼎爲工部尚書甲子火星犯南斗魁第一星乙丑發帑金十萬兩餉關門丙寅御史胡良機請罷內操不聽丁未命朱國楨釋奠太學戊辰王象乾言束把孩諸部叩關請撫賞發帑銀十萬太僕銀十萬給之壬申獲安賊黨何中蔚等獻俘磔之廢四川死難總兵楊愈副使李維周推官郭象儀等癸酉獎諭蜀王以捐金助工也甲戌趙彥回部理事

吏部會推王紀降旨切責丁丑四川鎮平堡地震朝鮮昭敬王妃請封下部議之戊寅復宗人充魴輔國中尉辛巳命恭順侯吳汝孕等查京營甲申奸人韓宗功伏誅九月戊子朔余懋學罷陳道亨致仕壬辰與魏學會謚廕癸巳給事中陳良弼陳言着鎮撫司打問大學士葉向高揭救不允乙未松潘地震向高乞歸不允良弼奪俸半年命南居益回部管事陞國戚王朝寵爲都指揮僉事丙申李宗延爲戶部尙書主事譚謙益薦妖人宋明時詔送薊遼總督軍前試

之甲辰大星狎軒轅乙巳大學士吳道南卒贈少保謚文恪丁未周應賓罷壬子諭留首輔葉向高癸丑吏部尙書張問達致仕冬十月辛酉毛文龍奏復金州及滿浦呂城壬戌給事中方有度叅毛文龍袁可立當罷不聽癸亥魏廣微入直供事甲子敘平妖功進趙彥太子太保廕錦衣僉事世襲己巳皇第一子生旋殤給事中熊奮渭請給遼陽死事諸臣謚允之辛未葉向高請停刑不許癸酉以趙南星爲吏部尙書甲戌再請停刑貴州兵克安賊碗哈羊雀等屯斬

獲甚衆乙亥京師地大震丁丑命停今年決囚海運
輸粟十萬石餉毛文龍軍巳卯皇第二子生慧妃范
氏出辛巳上以皇子生告太廟是日日生重暈暈旁
生左右珥甲申夜火星犯壘壁陣西南第五星閏十
月辛卯以蕭雲舉爲禮部尙書葬神宗清惠順妃李
氏於銀錢山乙未沅陵民家牛生犢一身二首三尾
又翫坪溪民家產豕長喙猪身人足隻眼戊戌以孫
瑋爲吏部尙書管左都御史事張經世爲戶部尙書
總督倉場毛文龍報董骨寨之捷巳亥宣延綏寧夏

甘肅三鎮捷祭告郊廟壬寅皇子生詔赦天下丙午
以毛文龍言建龍王廟於鹿島封顯應王庚戌以李
起元爲南京戶部尙書起楊漣爲左僉都御史乙卯
雲南地震盜入順天府庫四川仁壽縣長山裂聲如
雷長七里衡三尺深不可測十一月丁巳朔冬至躬
祀上帝於南郊以太祖高皇帝配封王昇爲新城侯
子國興爲指揮同知甲子以喬允升爲刑部尙書李
起元總督三邊乙丑慶陵饗殿成戊辰冊慧妃范氏
爲皇貴妃巳巳淮張國柱襲封安鄉伯孫瑋進太子

太保甲戌陝西賽平諸番族貢馬哈喇慎部朗素貴
英等糾三十六家挾賞犯中右所叅將王楹出擊遇
伏死之京師傳言上欲親征乙亥陝西鳳縣大鼠有
肉翅飛而害稼割其腹得粟一升朝鮮入貢楊述中
免乙酉錄貴州搗巢解圍功右都御史朱燮元等進
秩有差十二月丙戌朔泰寧三衛貢馬乙丑太白晝
見戊戌京師地大震陝西韓城妖人劉買得作亂擒
之丙午逐妖人宋明時丁未冊封成妃李氏南直應
天蘇松鳳泗淮揚滁州等處同日地震己酉停推薊
遼總督歸經略庚戌補給先臣楊繼盛全葬賜魏進
忠名忠賢提督東廠乙卯命黎惟祺襲安南都統使
旌天下節孝貞烈

東林列傳卷末下

江陰陳鼎定九輯門人

沈霽載陽

全校

蔡世英偉人

附熹宗原本本紀

下

四年春正月丙辰朔長興民吳野樵作亂殺知縣石有恒主簿徐可行戊午巡撫貴州都御史王三善自大方還貴陽半道為苗賊所遮師潰三善死之監軍

身本及傳
卷之
岳具仰同知方明棟梁明泰副將秦明屏皆歿賊勢
復張庚申天津三衛地震有聲川師入龍場獲奢崇
明及其妻子偽官蔡金貴等丁卯以馮從吾爲南京
右都御史葉向高請勿停添註以廣起用從之己巳
何宗彥卒癸酉上筮籬番人貢馬及方物乙亥左副
都御史喬應甲奏東林黨魁李三才借黃正賓汪文
言交通趙南星高攀龍等力爲援引上是之丁丑獲
妖人聞香教主王好賢誅之蘇州府同知楊姜忤織
造太監李實蘇松巡撫周起元發實侵漁違禁諸罪

不報葉向高請召還文震孟等不聽裁施歸兵備僉
事癸未日旁有黑子相盪凡四日二月辛卯張輔之
致仕壬辰張經世致仕癸巳葬冲懷太子丙申御經
筵月犯軒轅右星丁酉以左僉都御史沈儆烝爲南
京工部尙書薊州永平山海地震壞城郭廬舍無算
免川廣閩浙香貢命朱爕元處置蘭酋故地丁未以
風霾諭邊臣戒備己酉以緝捕功進錦衣衛田爾耕
少保兼太子太保壬子日黃無光甲寅京師地震宮
殿動搖有聲樂亭地裂湧水尺餘三月乙卯朔王象

東林列傳 卷之十一
乾丁母憂以吳用先爲薊遼總督丙辰京師地震戊
午京師地再震庚申夜復震者三癸酉視朝丙子進
田爾耕少傅兼太子太傅御史劉廷宣請祀宋儒張
載父迪於啟聖祠己卯諭京城緝盜癸未東江都司
張盤遇敵於南關嶺死之是月杭州兵變廕內寺魏
忠賢弟爲錦衣百戶夏四月甲申朔親享太廟丙戌
榆林衛民家生豕一首二身二尾八足石砮宣撫司
女將秦良玉其弟秦明屏死於王三善之難有旨勞
之命蔡復一總督雲南湖廣軍務賜尚方劍乙丑禮

部侍郎董其昌奏輯萬曆留中諸疏並薦李維楨宿
學史才從之獲妖民金科馬永等於江淮間誅之乙
巳陽曲榆次地震給事中傅櫬誣奏魏大中左光斗
與內閣中書汪文言交通罪狀詔下文言鎮撫司獄
戊申諭行當十大錢嚴私鑄工部尚書王舜鼎卒太
監魏忠賢緝私鑄廕賞命嚴訊汪文言大學士葉向
高乞歸不許敘淮徐禦妖功李養正進太子少保予
廕五月甲寅朔福寧州軍變命許顯純掌北鎮撫司
乙卯賜毛文龍蟒衣仍給敕百道以待有功壬戌禱

東林列傳 卷之十一
三
雨增鹽課癸亥乾清宮東墀旋風驟起吹內官監失
鉄片盤旋若紙墜於西墀聲若轟雷甲子沈灌死敘
黔中解圍復城功丁卯孫承宗求去舉趙彥自代不
許毛文龍請餉以四十萬給之己卯夜有流星如蓋
大青白色自壁入於天倉二小星隨之固原華亭大
雨雹塞上大旱六月癸未朔存問周府應城王在銓
並旌其子肅落孝行左副都御史楊漣劾魏忠賢二
十四大罪不問初魏廣微未相先事魏忠賢爲父密
導以邪徑及漣疏入忠賢懼謀於廣微令先逐葉向

高甲申忠賢辭東廠溫旨不允丁酉給事中傅櫬陳
良訓御史張訥各疏攻趙南星左光斗魏大中鄒維
璉等丙申通州新兵譁保定地震己丑魏大中等劾
魏忠賢客氏傳繼教傳應星之罪忤旨下詔獄向高
救之得免癸巳午刻南方五色雲見太僕少卿朱欽
相給事中許譽卿劉懋御史李應昇特疏糾魏忠賢
掌詹事禮部尙書翁正春給事中熊奮渭朱大典陳
奇瑜吳弘業霍守典孫綰統楊維新等御史劉璞劉
芳房可壯洪如鐘李喬崙郎申鄒維璉等各疏糾魏

忠賢皆不聽丙申大雨雹皇子慈煇薨謚悼懷太子
有中官騎馬入禁門毆傷衛士巡視科臣杜三策劾
奏不問大學士葉向高揭請退忠賢并罷內搯不聽
魏忠賢矯詔杖殺工部屯田司郎中萬燦戊戌撫寧
侯朱國弼劾魏忠賢奪俸閒任命錦衣衛逮其書奏
舍人於獄壬辰逮巡城御史林汝翥汝翥畏杖亾去
投遵化獄巡撫鄧漢以聞仍逮杖之霍州高時正家
生豕二身二眼象鼻四耳四乳尙書趙彥等合疏請
退忠賢詔勿過計甲辰命王守謙往關門諭留孫承

宗丁未朱熒元俘偽都督李遠達等二十五人至京
卹錄大方陣亾將士江南大水辛亥封光宗選侍傅
氏爲懿妃李氏爲康妃秋七月癸丑朔蘭酋奢史都
等伏誅紅彝通倭逼福建禦之辛丑大學士葉向高
致仕以朱光祚爲工部尙書總理河道南師仲爲南
京禮部尙書癸亥六科廊火南給事中楊棟朝劾魏
忠賢搜括南都之害御史李應昇爲慘死萬燦訟寃
黃尊素王振奇杜三策周洪謨萬言揚疏繼上俱報
聞御史劉廷佐請誅忠賢不報詔進大學衍義補給

事中劉懋請罷內操不報河決徐州山東饑賑之島
師三捷八月甲午左都御史孫瑋卒貴州兵克岩頭
寨以捷聞詔肅朝儀褒封五經博士孟所譽母張氏
曰貞懿上耕籍田廣順天解額申明會典輿服之禁
南兵部尚書陳道亨侍郎岳元聲等合疏請去魏忠
賢祭酒蔡毅中率合監師生千餘人請究忠賢二十
四大罪以遵祖訓皆不聽癸卯以高攀龍為左都御
史辛亥以李維楨為南京禮部尚書九月壬子朔命
直省搜求誌傳奏疏文集等書送史館以備纂輯從

御史劉芳請也發內運庫新造軍器於關門毛文龍
屢奏捷音御史袁化中駁之曰外之捷在我未嘗斬
將奪城在彼弗聞喪師失地小小捕獲何足獻俘俟
文龍俘叛人至然後宣捷告廟未晚也不聽庚申高
攀龍劾兩淮巡鹽崔呈秀貪污奪秩聽勘庚辰以馮
從吾為工部尚書冬十月壬午朔親享太廟大學士
魏廣微後至魏大中劾以不敬廣微求去溫旨慰留
廣微遂於魏忠賢所日媒孽之卒成乙丑丙寅之獄
乙酉以曹于汴為南京右都御史己丑敕諭羣臣辛

卯玉璽見漳水濱巡撫河南程紹以獻文曰受命於天既壽永昌丁酉吏部尚書趙南星致仕己亥右都御史高攀龍致仕福建官兵破走紅彝搗其巢獻俘封皇親王天瑞郭振明皆爲伯十一月辛亥朔斥署吏部事左侍郎陳于廷左副都御史楊漣左僉都御史左光斗並爲民起崔景榮爲吏部尚書李宗延以吏部尚書掌都察院事前大學士朱國祚卒督師大學士孫承宗請入賀萬壽面陳方略不許命速回鎮己巳大學士韓爌致仕十二月辛巳朔復逮汪文言

下詔獄召還賈繼春徐景濂王志道從御史梁夢環請也兩當民變殺知縣牛得用加朱爕元爲兵部尚書以周希聖爲南京戶部尚書丙申削吏部尚書趙南星籍大學士朱國楨罷李維楨引疾致仕喬允升罷以黃克纘爲刑部尚書癸卯南京地震如雷五年春正月庚戌朔五更木星逆行犯太微垣左執法辛亥召崔呈秀復其官戊午雲南巡撫閔洪學奏普安二新之捷辛酉諭江南重災地方漕糧改折三分之一浙江帶運糧米暫折一年甲子考察天下方

東林列傳 卷之十
面有司巡按貴州御史傅宗龍請暫停武舉專勵戰
勇拔真才以收實用從之戊辰舉卓異閔夢得等二
十四人命李蕃管理章奏癸酉卹貴州死難諸臣徐
朝炯孫克恕王昌胤楊以成鄭鼎等贈官予廕有差
吏部請燒燬追到楊漣左光斗等誥命一十七軸乙
亥大班糾核朝覲官員起李養春爲刑部尙書以董
其昌爲南京禮部尙書禮部左侍郎協理詹事府事
何如寵冠帶閒任太僕寺卿劉宗周革職追奪誥命
丁丑賜敕獎毛文龍戊寅以慶陵成加孫承宗少師

兼太子太師兵部尙書俱進建極殿大學士林堯俞
太子太保皆予廕舊輔葉向高加上柱國廕尙寶司
丞朱國楨加少師兼太子太師吏部尙書建極殿大
學士廕中書舍人太監魏忠賢廕錦衣都督同知王
體乾等亦陞廕有差曹于汴辭免南京右都御史新
命許之南京兵部尙書陳道亨罷左副都御史喬應
甲劾李三才爲東林黨魁并及張問達趙南星高攀
龍曹于汴段然諸臣章凡二十上俱下所司察議蔡
復一奏織金之捷發帑銀十萬兩充黔餉是月白菱

湖奸民楊桓等聚眾倡亂，僞稱懿德元年擒之。二月庚辰朔，以陵工加林堯俞太子太保，予廕朝鮮來賀。壬午，以湖廣山東江西福建鄉試策問多譏刺語，鑄主考方逢年、章允儒、熊奮渭、李繼貞、丁乾學、郝士膏、顧錫疇、黃承業等各三級調外用。御史劉廷佐論救，亦鑄級調外。乙酉，命顧秉謙、魏廣微爲會試主考。大理寺丞徐大化疏攻趙南星、孫慎行，并追論移宮及汪文言罪案，遂命錄用何熊祥、王永光、申用懋、朱一桂、陸卿榮、王伉、秦聚奎、汪慶百、徐揚先、郭鞏、劉廷宣。

邵輔忠、姚宗文、范得志諸人更換朝鼓。己丑，余懋衡疏辭南京吏部尚書，新命許之。戊戌月，掩氏宿東北星壬寅，予孫如游謚文端。甲辰，朱光祚罷。乙巳，逮戚臣李承恩，下鎮撫司獄。魏忠賢誣其擅用御物也，追理刑部右侍郎王之寀，請嚴挺擊，主使之罪，斥爲民。丁未，楊柄疏劾巡撫順天鄧漢賄結汪文言，并糾何棟如、詔鑄、漢三級調用。逮棟如，勘問命太監王敏政、胡良輔冊封朝鮮李倧嗣爲國王。戊申，我兵破旅順，遊擊張盤都司僉書朱國昌死之。三月辛亥，工部主

事曹欽程劾東林黨魁周宗建張慎言李應昇黃尊素薦忠憤之臣傅櫬陳九疇李魯生張訥李蕃周昌晉李恒茂梁夢環張惟一顧其仁宗建等坐削籍逮問慎言命撫按追贓壬子柳佐卒癸丑李若星奏鎮蕃之捷起王在晉爲南京吏部尚書王永光爲南京兵部尚書改畢自嚴爲南京右都御史甲寅幸太學釋奠先師臨彝倫堂魏忠賢以不便於已廢祭酒坐講三品上大臣坐聽之禮乙卯加魏忠賢弟姪官一級以緝獲李承恩功也丁巳詔革冗官下游士任於鎮撫司孟淑孔並行勘問己未趙彥搜括班軍折價銀十一萬兩九千八百有奇助工李仙品回籍聽勘庚寅命議經撫去留辛酉戶部侍郎陳所學罷壬戌總兵官魯欽劉超濠入水西兵潰總督蔡復一上章自劾詔欽超帶罪立功甲子起文球爲兵部侍郎兼右僉都御史協理京營戎政甘肅巡撫李若星削職爲民追奪誥命黔國公沐昌祚卒嘉魏忠賢修肅寧城功廢錦衣都督僉事於本邑建坊旌表從逆黨崔呈秀請也丙寅策試天下貢士賜余煌等三百人進

東林列傳 卷之十
士及第出身有差命沐啟元襲祖爵掛印充總兵官
鎮守雲南毛文龍請借京營龍尾機砲以應軍中急
用許之戊辰上諭許念敬送鎮撫司與汪文言一並
勘問薊遼總督吳用先冠帶閒住庚午弘政宣治二
門興工甲戌蔡復一致仕命朱燮元兼督貴州以李
長庚爲戶部尙書兼右副都御史督理糧餉巡撫天
津丁丑掌北鎮撫司許顯純讞汪文言之獄請逮楊
漣左光斗袁化中魏大中周朝瑞顧大章同訊又誣
奏趙南星王之寀熊明遇惠世揚毛士龍繆昌期鄒

維璉黃龍光黃正賓鄧渙李若星盧化鰲徐良彥錢
士晉施天德等並行撫按勘問追贓銀六萬兩法司
會勘李承恩夏四月辛巳汪文言死於北鎮撫司癸
未太白晝見丙戌開鼓鑄於荊州丁亥發衝車百輛
於關門給事中霍維華借紅丸移宮之案誣奏王安
劉一燝韓爌周嘉謨張問達孫慎行罪詔毀監生楊
惟休私刻泰昌日錄宥李可灼回籍一燝等俱斥爲
民加舊輔沈一貫少師癸巳起王之臣兵部侍郎總
督薊遼何士晉削籍戊戌賜川湖雲貴總督朱燮元

尙方劍便宜行事借太僕銀十萬兩給邊己亥削劉
一燦籍養馬當差高攀龍奪職爲民起范濟世爲南
京都察院右僉都御史提督操江熱審慮囚以緝獲
武元吉功廕魏忠賢弟姪一人都督僉事丙午發中
宮及諸王公主助餉銀四十萬於各邊五月戊申朔
逮原任御史方震孺下刑部獄沈正宗削籍蔡毅中
宋槃致仕霍守典罷王洽閒任劉憲寵褫職己酉兵
部尙書趙彥致仕庚戌韓光祐罷贈朱國祚太傅沈
淮太保並予謚岳駿聲追訟張差確係風癩命鄭養

性回京居住下御史袁化中北鎮撫司究問丁巳翁
正春罷行宗室限祿法己未以施鳳來錢龍錫丁給
軾李康先李標吳宗達充實錄副總裁癸亥楊所修
言挺擊紅丸移宮三案宜倣明倫大典勒成一書以
示天下從之甲子趙彥張問達周嘉謨削籍乙丑躬
祀皇地祇於方澤回宮卽泛舟西苑溺水賴救得免
同載幼璫二人溺死丙寅前禮部尙書王圖閒任陳
序糾之謂爲門戶渠魁庚午白所知罷命魏忠賢姪
良卿僉書南鎮撫司徐光啟罷壬申以高第爲兵部

尚書不顧大章於北鎮撫司六月丁丑朔命衡世子
由口慶世子倬灌潘世子效鏞周世子恭榜蜀世子
至澄並嗣爲王延安大風雪三日是歲大饑人相食
戊寅蕭雲舉罷翟鳳翀削籍聽勘庚辰濟南飛蝗蔽
大秋禾傷盡辛巳余文燿疏叅葉向高陳一元陳長
祚一元削籍田景新糾次輔朱延禧壬午張鳳翔罷
丙戌朱延禧致仕樂元聲回籍聽勘姚希孟削籍起
黃汝良爲禮部尚書兼翰林院學士掌詹事府事周
如磐爲禮部尚書兼翰林院學士協理府事以王紹

徽爲左副都御史丁亥命毛孟龍襲封南寧伯巳丑
下左光斗於北鎮撫司庚寅鄖陽巡撫畢懋康前吏
部左侍郎李騰芳削籍辛卯下魏大中於北鎮撫司
甲午中官韓世祿劾高陽知縣唐紹堯遣緹騎逮之
丁酉王圖程正巳趙昌運彭遵古李日宣程國祥削
籍當差擢魏忠賢甥楊六奇爲錦衣同知朱光祚削
職爲民癸卯下楊漣於北鎮撫司秋七月丁未朔躬
享太廟滇南始開鼓鑄戊申胡應台罷庚戌下原任
御史方震孺於刑部獄楊漣左光斗袁化中魏大中

周朝瑞顧大章等諸奸以僅坐移宮不足蔽辜乃誣
漣等並受熊廷弼賄囑許顯純等逐日比贓以肆其
毒遣鴻臚官宣諭魏廣微入閣辦事戊午太白晝見
辛酉御史倪文煥誣劾李邦華李日宣周順昌林喬
枝等以講學譏訕朝政請碎其碑庚午韓策汪先岸
追奪誥命選劉有福尙六公主齊贊元尙七公主何
棟如謫戍崔景榮致仕以李宗延爲吏部尙書壬申
削原任大學士韓爌籍左副都御史楊漣左僉都御
史左光斗並死於北鎮撫司被察御史康丕揚追論

楚宗妖書事請定郭正域罪趙世卿議事不阿乞與
議謚章下九卿科道詳議甲戌吏科都給事中魏大
中死於北鎮撫司命嚴追袁化中等贓八月丁丑朔
御史石三畏追論萬曆三十九年四十五年天啟三
年三次京察顛倒是非主其柄者爲邪臣李三才顧
憲成王圖孫丕揚曹于汴胡忻王元翰王淑汴湯兆
京王宗賢趙南星張問達王允成涂一榛王象春等
十五人皆當治罪詔生者削籍當差死者追奪誥命
已經削奪者禁錮并其子孫毛文龍疏頌冊封朝鮮

中官王敏政胡良輔使不辱命温旨報聞御史張訥
奏毀天下書院削奪鄒元標孫慎行馮從吾余懋衡
等六十人官甲申以鎮撫司緝獲蔣應陽功加魏忠
賢弟姪爵二級戊子諭內閣曰朕自去歲屏逐兇邪
廓清朝宇勵精圖治雅意中興秉軸大臣莫有爲朕
分憂共念者卽如楊漣左光斗移宮一事背先帝之
深恩陷朕躬於不孝又能延弼等喪師辱國寸斬尙
有餘辜楊漣等乃受其重賄巧爲出脫天地不容神
人共憤而在朝文武持祿養交徇私避禍但顧子孫

之計不圖社稷之安朕方率循舊章而曰朝政日亂
朕方祖述堯舜而曰大不相侔以致言官承望風旨
緘口結舌無敢直言其非自今宜改悔圖新共維國
是如仍有陰懷觀望借題報讎或捏寫蜚書希圖翻
案者朕按祖宗所立紅牌律治以說謊欺君之罪必
不食言中朝政日亂大不相侔二言魏廣微揭中語
也廣微大懼求救於顧秉謙又卸過於崔景榮故忠
賢惡景榮而疏廣微命周如磐丁紹軾黃立極爲禮
部尙書馮銓爲禮部右侍郎並兼東閣大學士入閣

辦事九月丁未掌河南道御史袁化中死於北鎮撫
司丁酉蔣應陽棄市以王紹徽爲左都御史徐大化
爲副都御史吳宗禮爲南京刑部尙書己亥魏廣微
林堯俞並回籍壬寅冊封任氏爲容妃殺遼東經略
兵部尙書熊廷弼傳首九邊丁未太僕少卿周朝瑞
死於北鎮撫司以呂兆熊爲戶部尙書總督倉場甲
寅前登萊監軍僉事佟卜年死於獄壬子遼師敗於
錦州副總兵魯之甲死之甲寅皇極弘政宣治諸門
工成加恩中官王體乾魏忠賢李永貞等並廕弟姪

一人錦衣僉事忠賢加賞銀五十兩紵絲三表裏別
廕一人都督同知給與應得誥命陝西提學副使顧
大章死於刑部獄中詔以楊漣等六人獄詞頒示中
外又前鋒榜湯兆京等明告天下崔景榮李孔度削
籍夏之令逮問戊午周道登削籍辛酉給事中霍維
華請採雲霧山木以佐殿工戊辰以李從心爲工部
尙書冬十月丙子朔皇第三子生容妃任氏出原任
大學士葉向高辭免殿工加恩不允癸未川湖總督
朱燮元陳會剿機宜優旨從之甲申准民間俊秀納

銀入學召兵部尚書高第經略遼東賜尚方劍及蟒
玉銀幣諸物經略遼東乙酉康丕揚遣戍丙戌以皇
子生停今歲決囚土星犯太微垣上將丁亥傅宗龍
上屯守方略戊子命禮部造鎮守薊鎮中西八路關
防月犯畢宿火星庚寅大學士孫承宗致仕予馳驛
歸辛卯改王在晉爲兵部尚書命禮部造經略遼東
薊鎮天津登萊等處軍務關防壬辰御史潘汝楨參
朱世守楊一鵬劉策陸完學俱命削籍甲午誥敕中
書吳懷賢以稱道楊漣疏爲忠賢所惡下鎮撫司獄

掠死戊戌擢許弘綱爲南京兵部尚書十一月丙午
朔追封容妃任氏爲皇貴妃己酉揚州知府劉鐸以
書箠有刺時語爲緝事者所告逮下鎮撫司辛亥詔
停止南都解茶壬子周如磐致仕陳熙昌陳子壯俱
削籍熊明遇提問追贓乙卯刑部獄房火廕魏忠賢
族叔志德爲都督僉事己未萬壽節御門受賀甲子
以冬至大祀奉皇祖配遣駙馬都尉侯拱辰告於太
廟丙寅加原任工部尚書丁賓太子太保丁卯躬祀
上帝於南郊上御殿受賀以臨雍特恩賜孔氏宗人

東林列傳 卷之十
孔聞範等入監讀書喬允升冠帶閒任甲戌嘉獎田
爾耕總督川湖雲貴兵部侍郎蔡復一卒於軍詔贈
兵部尚書謚忠惠革錦衣衛南鎮撫司指揮同知張
道濬回籍十二月乙亥朔刊示東林黨人姓名於天
下丙子毛文龍偽爲俘獲百三十人以獻廣鹿石城
二島溺死五人至登州私逃二十人登撫發兵緝捕
皆拒敵死至京僅存十一人餘皆托之逃溺給事中
楊文岳劾之章下所司癸未李宗延罷李養正乞休
許之以王紹徽爲吏部尚書周應秋爲刑部尚書乙

酉薛三省致仕丙戌以緝獲功廕魏忠賢甥傅應星
爲左都督戊子原任吏部尚書趙南星以忤魏廣微
併其子清衡俱戍邊太常少卿阮大鍼疏薦謝陞傅
櫬命吏部酌議以聞御史王珙頌魏忠賢籌國緝奸
功優詔答之錦衣指揮僉事高守謙毆殺原任檢討
丁乾學於其第削奪金世俊米萬鍾王繼謨馬孟楨
韓奇象方有度歐陽調律翟學程公鼐等三十六人
官方大任提問追贓練國事李玄王祚昌霍鏜楊新
期談自省等削籍復以緝獲功擢魏忠賢族弟宗孔

都督同知予魏忠賢甥傳應星父尚才母魏氏祭一壇仍建坊以旌母節辛丑御史吳裕中糾丁紹軾詔杖於闕下杖畢遂卒改周應秋爲左都御史壬寅黃克纘罷董其昌致仕甲辰裕享太廟賑河間旱饑旌表節孝貞烈

六年春正月乙巳朔上御皇極門受賀庚戌高第奏我兵入右屯甲寅詔追王之冢周宗建張慎言熊明遇方大任及已故陶朗先楊漣左光斗顧大章贓銀以助大工給事中潘士聞疏劾曹欽程欽程削籍以

逆黨攻逆黨也丙辰名皇子曰慈炁擢徐兆魁爲刑部尙書戊午敕纂三朝要典以顧秉謙丁紹軾黃立極馮銓領之甲子擢李思誠爲禮部尙書戊辰大風揚塵四塞庚午我兵圍寧遠辛未寧遠圍解御史夏之令死於北鎮撫司以喬應甲爲南京右都御史二月甲戌朔嚴逃兵之禁乙亥加寧前叅政袁崇煥爲僉都御史專理軍務仍駐寧遠毛文龍請釋王化貞切責之丁丑西部入犯平川三山禦却之己卯周應秋請嚴追楊漣左光斗等贓庚辰月掩畢宿火星以

東林列傳 卷之十
來宗道爲南京禮部尙書削石三畏籍逆黨自相攻也甲申賜駙馬都尉劉有福冊誥冠服周如盤卒贈少保謚文懿己丑刑部擬惠世揚大辟候決大風揚塵四塞庚寅周應賓卒贈少保謚文穆壬辰崔呈秀頌魏忠賢觸事懷忠請宣付史館從之起張鶴鳴爲南京兵部尙書癸巳大風揚塵四塞乙未大駕鹵簿成廕魏忠賢弟姪一人都督僉事丙申錄四川殉難諸臣李忠臣等之後戊戌蘇杭織監李實疏叅原任應天巡撫周起元并周順昌高攀龍李應昇周宗建

繆昌期黃尊素等皆遣緹騎逮之詔袁從煥奪情視事己亥上親朝日壇庚子大風揚塵四塞二月甲辰朔命南和伯方一元掌南京後軍都督府事丙午高第乞病歸命總兵官滿桂以原官守寧遠丁未以中官爲各鎮監軍敘緝獲功封魏忠賢姪魏良卿爲肅寧伯予誥券世襲吏部尙書王紹徽請給以四代誥命併及忠賢祖父從之命袁崇煥巡撫遼東方震孺擬絞庚申區大倫削籍陰霾如雨成基命冠帶閒任以劉廷元爲都察院左副都御史蘇州民變擊死逮

東林列傳 卷之十
周順昌旗校甲子命王之臣爲兵部尙書兼都察院
右副都御史經略遼東閻鳴泰總督薊遼封西洋大
砲爲安國全軍大將軍丙寅姜逢元冠帶閒任己巳
三朝要典成夏四月癸酉朔親享太廟敘緝獲功廕
魏忠賢弟姪一人爲都督同知仍賜敕獎諭熊明遇
遣戍賜魏良卿第宅朝房黃龍光鄧漢鄒維璉徐良
彥遣戍乙亥遣官分取花石丁丑諭括各路銀助工
己卯原任兵部尙書黃嘉善卒贈太保海寇林七老
等合紅彝作亂官軍討平之己卯川貴總督朱燮元

擒奢寅以捷聞癸未下繆昌期於北鎮撫司丙戌原
任左都御史高攀龍赴水死崔呈秀直陳要典之原
優詔答之敘寧遠功廕魏忠賢弟姪一人錦衣都指
揮世襲加袁從煥兵部侍郎巡撫如故餘陞賞有差
癸巳上以敘功本未列崔呈秀名命以工部侍郎兼
都察院左副都御史列名劉廷元之後禁彝人收買
鐵器是日白露著樹如垂綿日中不散丁酉工部興
工修信王邸第戊戌丁紹軾暴死贈太保謚文恪是
日東北方有白雲名天裂頒肅寧侯鐵券庚子下周

順昌於北鎮撫司南御史張繼孟削職提問追贓助
工再敘寧遠功李起元等各陞賞有差五月癸卯朔
董可威罷丙午以盛暑輟講陝西巡撫追叅孫瑋乞
革去恩廕追奪誥命從之原任左諭德繆昌期死於
北鎮撫司戊申王恭廠災焚死軍民無算是日薊州
地震密雲俱地震有聲如雷三日乃止毛士龍黃正
賓遣戍夏嘉遇擬徒姜志禮削籍己酉以王恭廠災
下詔修省癸亥朝天宮災甲子以薛鳳翔爲工部尙
書巡撫登萊武之望劾毛文龍跋扈報聞丁卯以黃

汝良充經筵講官戊辰賜肅寧侯魏良卿莊田七百
頃於獻縣庚午神宗實錄成六月丙子京師地大震
天津三衛宣大連震山東濟南二府河南一州六縣
皆震傷軍民無算丁丑皇子薨給魏忠賢三代祭葬
誥命棄陳一敬市武長春所妄扳也丙戌霧重如雨
戊子吏部員外郎周順昌御史周宗建並死於北鎮
撫司河南盧氏奸民李宗善等聚衆爲亂官兵擊擒
之庚辰大學士顧秉謙等進三朝要典閏六月御史
陳朝輔糾馮銓媚佞請斥之不聽巡撫浙江潘汝楨

首疏爲魏忠賢建生祠御史黃尊素死於北鎮撫司
壬寅陳朝輔再糾馮銓命銓回籍聽勘冊謚懷獻太
子以倡議蠲免鋪墊賜敕獎諭魏忠賢遣錦衣衛千
戶王蒞民往徽州逮吳養春以擅黃山利也改原任
總兵滿桂爲中府僉事御史李應昇死於北鎮撫司
以朱一桂爲南京右都御史壬子月犯天江第二星
陞閔夢得爲兵部右侍郎兼右僉都御史總理五省
兵馬錢糧乙卯月食陰雲不見毛文龍僞捷報功辛
酉鑄巡歷諸路覈軍餉太監官防以給紀用陶文等

下周起元於北鎮撫司陞馮三元爲都察院右僉都
御史協理院事壬戌中府草場火殺擊旗校蘇州義
士顏佩韋馬傑沈揚楊念如周文元等五人王紹徽
罷李若星遣戍秋七月辛未朔日有食之親享太廟
日食陰雲不見河南地震黜刑部沈演爲民癸酉停
採雲霧山木命滿桂鎮守山海關掛印駐關門兼轄
四路以周應秋爲吏部尙書王永光罷乙亥畿輔地
震辛巳寧夏地震命戎政尙書馮嘉會回兵部管事
以薛貞爲刑部尙書房壯麗爲左都御史殺揚州知

府劉鐸丙戌擢施鳳來張瑞圖李國樞並爲禮部尙書兼東閣大學士入閣同首輔顧秉謙辦事李啟元致仕己丑月犯畢宿山西靈丘地震庚寅登州城樓火辛卯以郭允厚爲戶部尙書蘇茂相爲戶部尙書總督倉場安南入貢乙未崔呈秀爲工部尙書兼左副都御史督察大工八月黃汝良致仕庚戌新城伯王昇子錦衣衛指揮王國興以魏忠賢誣奏論斬癸丑以駱從宇爲禮部尙書兼翰林院學士掌詹事府事吳從禮罷辛酉賜閔夢得尙方劍琉球入貢丁卯

劉廷元請改正光宗實錄九月甲戌福建地震編修姜曰廣給事中王夢尹頒詔朝鮮毛文龍稱病乞罷不允戊寅另設關外餉司己卯徐如珂朱欽相削籍辛巳以靳于中爲南京刑部尙書巡撫應天兼僉都御史錢龍錫倪思輝削籍周起元死於北鎮撫司癸未太白晝見庚寅顧秉謙致仕甲午皇極殿成帝御殿受賀有聲如怒濤自殿中出朝班闕然魏良卿以殿工功進肅寧侯原任左都御史李誌卒順天府丞劉志選承魏忠賢指誣奏皇親張國紀以危中宮御

東林列傳 卷之一
史梁夢環繼之詔捕其家人下詔獄冬十月庚子朔
上御皇極殿頒曆親享太廟加賜魏良卿田三百頃
孝陵指揮李三才爲魏忠賢建祠賜額曰溥仁戊申
進魏忠賢爲上公加恩三等進魏良卿爲寧國公世
襲賜之誥券祿米視魏國公例歲支五千石莊田再
加一千頃以示眷酬改修光宗實錄甲寅以殿工加
恩輔臣及部院卿寺並進爵有差毀江南江西等書
院田土變價三千一十七兩以助大工壬戌工部尚
書薛貞請加賜魏忠賢第宅命於己給一萬九千兩

外更給三萬五千兩以示優禮元臣至意周應秋請
再敘殿工十一月壬申宴外國使於左闕門乙亥畢
自嚴罷戊寅以修孝陵功加恩魏忠賢三等廕子姪
一人錦衣指揮僉事世襲丁亥南京地震己丑賜魏
良卿寧國公鐵券袁可立致仕以劉廷元爲南京兵
部尚書叅贊機務閔洪學爲南京右都御史癸巳宣
甘鎮捷加恩魏忠賢三等廕弟姪一人錦衣指揮使
以殿閣工成陞授各監官匠及効勞委官王引直等
共九百六十五人逮房可壯楊嘉祚追贓十二月己

亥朔魏忠賢彙奏三年緝獲功廕弟姪一人錦衣指
揮使世襲楊寰孫雲鶴許顯純皆加太子太保辛丑
以山海關工成廕忠賢族姪希聖錦衣指揮同知復
以秋防功廕忠賢甥馮繼先錦衣指揮同知戊申南
京地震以范濟世爲南京工部尙書辛酉起張鶴鳴
仍以太子太傅爲兵部尙書兼都察院右都御史總
督雲貴川廣軍務兼督糧餉巡撫貴州偏沅以商周
祚爲南京工部尙書予蔡復一祭葬癸丑給田爾耕
孫繼華指揮僉事全俸時方二歲潯州六斗窠賊胡
扶紀等作亂殺守備綦人龍把總鄧養等總督商周
祚以聞戊辰李思誠削籍歲暮行大祫禮告太廟旌
表孝義節烈

七年春正月己巳朔上御門受賀乙亥命中官涂文
輔總督太倉銀庫崔文昇總督漕運河道李明道提
督通倉魏忠賢捐銀三萬餉遼廕弟姪一人錦衣指
揮使世襲辛巳月犯軒轅大星甲申雲南定邊縣風
雷雹霧橫漲漂沒鶴慶府鎮姚所石屏雲龍二州俱
地震千崖宣撫司大星飛隕戊子南京地震盜入桃

源縣劫庫縱囚庚寅信王疏辭景府地租銀兩優詔從之辛卯徐縉芳遣戍裁減三王之國公費二月己亥王之臣乞病歸庚子信王出府成婚甲辰命總督登津鎮守海外等處便宜行事中官胡良輔等移鎮皮島仍給敕諭關防丙午再敘寧遠修城功廕魏忠賢弟姪一人錦衣指揮使丁未賜寧國公魏良卿肩輿逮遵化道耿如杞丙辰命代世子鼎渭嗣爲王丁巳瑞王常浩惠王常潤桂王常瀛俱之國擢劉志選爲南京都察院右僉都御史提督操江己未以史永

安爲兵部右侍郎兼都察院右僉都御史總督三邊三月辛未我兵圍鐵山壬申豐城侯李承祚奏開採珠池銅礦不許戊寅我兵下安州旋攻黃山堡庚辰以雲南平定武尋之復宣捷午門丁亥以韓日纘爲南京禮部尙書戊子我兵攻朝鮮庚寅命魏忠賢所廕指揮使俱改尙寶丞夏四月丁酉朔親享太廟銀定矮木諸部犯邊擊却之斬首百八十級下王之案於北鎮撫司戊戌上傳諭太常寺時享太廟牲牲不潔着令嚴處飭行工部主事呂下問激變黃山士民

東林列傳 卷之六
回籍聽勘己亥馮嘉會卒以王之臣爲兵部尚書辛
丑煖泉等部入犯禦却之擒獲阿班歹等歸功魏忠
賢敘廕辛亥程正己遣戍壬子以隆德殿工成廕魏
忠賢弟姪一人爲指揮使癸丑刑部侍郎王之寀死
於北鎮撫司李宗延卒范濟世罷以張璞爲南京戶
部尚書五月丙寅朔安南入貢庚辰松套諸部合騎
入犯禦却之辛巳我兵圍錦衣壬午封銀礦洞口以
三藩役竣廕魏忠賢弟姪一人爲錦衣指揮使擢張
曉爲兵部尚書兼右副都御史總督宣大山西等處

軍務插漢諸部入犯總兵官姚世卿撫之遂受款乙
酉命戶部開會計局清天下賦役冊及九邊兵籍太
學生陸萬齡請祀魏忠賢於國學內以配孔子許之
丙戌我兵圍塔山錦州圍解甲午開濮餘孽鄭江等
復作亂官兵擊平之六月我兵攻寧遠總兵滿桂禦
却之遂奏錦州解圍之捷海寇一官老犯福建銅山
等處宣延鎮捷秋七月乙丑朔命魏良卿攝享太廟
以宣捷詔諭羣臣總督商周祚奏潯州勦盪功報聞
丙寅袁崇煥致仕己巳申禁鄉會試文不得詆毀朝

政癸酉上不豫詔遼士子山東鄉試中二名己卯敘
錦州功封魏忠賢四歲孫魏鵬翼爲安平伯加少師
歲祿二千一百石賜誥券壬午戌原任禮部尙書孫
慎行於寧夏賜魏鵬翼土田七百頃刑部尙書薛貞
以高攀龍之死由其子世儒不能防閑奏戌邊衛移
內市於元武門八月甲午朔豐城侯李承祚頌魏忠
賢功比中山王請如例封兩公章下兵部丙申霍維
華敘寧遠功加恩寧國公魏良卿於見任太子太保
上加太師而止尙餘一級統候聖裁上諭歲增祿米

三百石仍給誥券以彰優禮元勲至意戌戌以三殿
告成封魏忠賢弟姪一人爲侯世襲大學士黃立極
等各進官有差中旨以崔呈秀爲兵部尙書仍兼左
都御史庚戌以崔凝秀充總兵官鎮守浙江乙巳召
見閣部科道官於乾清宮諭以魏忠賢王體乾恪慎
忠貞可與商格推大事黃立極等對曰皇上任賢勿貳
諸臣敢不仰體盛心帝悅丙午頒示東林後勁榜於
天下再敘殿工封魏忠賢姪魏良棟爲東安伯賜予
如鵬翼餘皆陞賞有差是年薊遼總督閻鳴泰順天

巡撫劉詔巡按御史倪文煥梁夢環請建魏忠賢祠
於西協賜名崇功工部商人建於京師曰崇仁建於
通州曰懷德太僕寺少卿何宗聖建於房山曰顯德
薊遼總督閻鳴泰巡撫袁從煥建於寧前曰懋德總
督宣大張璞巡撫曹爾楨巡按劉弘光建於五臺山
曰報功建於太和山曰昭德李若琳建於蕃育曰感
恩薛世昌建於松江曰德馨巡宣府秦士文建於宣
府曰隆勲總督張璞再建於宣大曰德勲建於鳳陽
曰旌德建於建昌曰崇德工部郎中曾國楨建於盧
溝橋曰隆恩監生陸萬齡請建於國學春秋祀通政
司經歷孫如剡建於宣武門外曰懋勲延綏巡撫朱
童蒙建於本鎮曰祝恩武清侯李銘建於崇文門外
曰鴻勲總督保定梁世勲建於安定門外曰著愛工
部侍郎盧大受建於京師總督閻鳴泰建於景忠山
曰廣恩登萊巡撫李嵩巡按李精白建於泰山曰隆
熹並嶽又寧海祠曰景仁蓬萊閣曰流鴻總督遼餉
戶部尚書黃運泰保定巡撫張鳳翼提督學政李蕃
巡按倪文煥建於河間曰仰德建於天津曰感仁上

林院監丞張永祚各建三祠曰存仁曰洽恩曰承恩
五軍都督府等衙門建於京師曰德芳曰茂勲河南
巡撫郭增光巡按鮑奇謨建於開封曰戴德江北曰
瞻德巡撫張鳳翼建於真定曰旌勲巡撫大同張翼
明建於赤城曰崇功總河侍郎李從心漕運侍郎郭
尙友等建於濟寧曰表勲巡鹽御史許其孝建於揚
州一曰瞻恩一曰流恩湖廣巡撫姚宗文鄖陽巡撫
梁應澤巡按溫臯謨建於武昌曰隆仁承天曰弘惠
均州曰戴恩總督三邊史永安巡撫胡廷美巡按莊

謙建於太白山曰懋彝楚王華奎建於高冠山鳳皇
嶺之陽亦曰隆仁直隸提學御史李蕃再建於河間
題曰九千歲山西巡按李燦然會同巡撫牟志夔建
於河東曰褒勲福府承奉建於洛陽蘇州巡撫建於
虎丘曰普惠李實建於杭之西湖請以百戶沈尙文
等世守之賜額曰普德施鳳來記其事張瑞圖書而
刻諸石時生祠徧天下皆請賜額淮安曰瞻德崇文
門曰廣仁濟寧曰昭德河南曰成德山西曰報功大
同曰嘉德登萊曰報德房山曰顯德陝西曰祝恩徽

東林列傳 卷之十一
州曰崇德通州曰懷仁昌平亦立二祠曰崇仁曰彰
德密雲曰崇功林衡署曰永愛江西最後曰隆德獨
福建竟未有請者甲寅帝大漸傳旨肆赦二十二日
乙卯崩於乾清宮年二十三遺詔以皇五弟信王嗣
皇帝位十月庚子上尊謚曰達天闡道敦孝篤友章
文襄武靖穆莊勤愍皇帝廟號熹宗明年三月葬德
陵

外史氏曰熹宗天資刺謬而性多淫巧酷嗜鷹犬作日
操斧斤爲之既成復毀又喜馳馬試劍手格狐兔而

爲笑樂以是逆奄伺其所好日供斲削之事俾無刻
暇一切章奏皆不及覽遂致太阿下移羣凶在列屠
戮忠良放逐賢正使天下囂然喪其廉耻之心竟有
奉忠賢以竊窺神器者而帝昏然罔覺乃至三案之
事身所諄諄告誡焉者亦任其翻倒而莫之知安望
其能整齊庶政乎天禍人國生此不才而破壞天下
至於不可收拾俾烈皇帝承之蓋亦不幸而逢其會
矣

余作是稿皆以下東林諸賢於北鎮撫司爲文後同

事者悉改爲詔獄余以爲不然夫詔獄者天子之獄也北鎮撫司雖曰天子之獄實逆璫私有者也烏可
以天子之獄而斃諸賢良乎余故悉仍其舊至於災
異例另有志故同事者刪之然當此君昏臣逆之時
不附以災變則依然光天化日之中也何足以儆後
世之君臣乎余故亦仍其舊至於祠璫諸臣同事恐
得罪其子孫之有力者盡刪其姓名余謂史以直筆
爲正古者史官屢殺而屢書故其人其文傳之于古
也夫明著其姓名正使其孝子慈孫百世不能改而



卷之五